

Basef Jisas Krais Nigihimba'manaef Joni Ma Hiahaom Migi' Mogatagai

**Basef bandafi Jisas Kraisi ma hiahaom anaf
migi' mogatagai**

1:1-8 Jon nanda' basefa na'oh nandondo'ah naga
tivilifi fafe'ma esis sios 7-pelais NASA'ma agol
Jisas Kraisi lu'wagol

1:9-3:22 Jon nati Jisas Krais nogogala' a'owa'i ea'
nanda' basef ananifi fafe'ma esis Kristen hiasi
sagape sios 7-pelaisi

4:1-8:1 Jon nati heven ilif nati Jisas Krais naloma
Ahamana God maloma ensel hiami ea' nati
Jisas natagwaha tep 7-pelaip

8:2-11:19 Jon nati ensel 7-pelaim mufapula bi
ugel nondandam

12:1-13:18 Satan anaf nopa' noloma ensel Godi
hiami mili'amonana nisila'i itap apa'e

14:1-15:8 Jon nati Jisas anaf nondati si'i sipsip
nogonai noloma ensel wanom moha epes so
gowa' alafugaha Godi kwapete'as

16:1-21 Jon nati anom ensel 7-pelaim daiam
mohapila maloh hondandam

17:1-19:21 God anaf nogwamasa waf awafi epes
isimba wambel Babilon, ea' Krais nafi'i nan
dati si'i aman natoma hos afitini nagafi'ii

20:1-20:15 Satan nanda' kalabus nope nowaga
launai atapina, ea' God nowaloga epes hiasi
hi'ilas

21:1-27 Jerusalem dambaigima

22:1-6 Walemb ambal namili lagapaimbeli baloma lawah ambal namiligahi

22:7-21 Basef Jisas Kraisi akutaifinofala epes hiasi ma sigafi'mai anen

1 Fowa' gani basef amamba mape mandambaho' apa' dei' Jisas Krais nanda'am mandawalap alihim. God naso'anam Jisasa nowalapam nigihimba'ma anom manda'mana maol Godi ma mogawalapa hiahaom mape mandambahi'i mogataga kwafalis. Anen naso'afa gawa afa' wanda' maola anini ma hiahawes isimba. Ea' dei' nasapa'i ensel ananinai nafi'mai ae' Jon. Ae' dei' anda'mana maol Godi, ea' anen nase'e basef ae' wapani.*

2 Ae' atolom ea' hiahaom amamba awalapam a'iam alihim basef Godi faloma basef ifimba endil-isifi Jisas Krais nanda'ef fandawalap alihifi.*

3 Epes ami sogotalifa basef ifimba Godi fagail buk akwa'e ma malogof asasigufi ma hiahaom anaf migi' mogatagai, esis atiasi God nond'a's sonohas. Ea' epes ami sogame' basef ifimba ma ukup asasipii, esis sonohas wapani. Dei' main, nemafa hiahaom amambai migi' mogatagai fele-fele'ma mogataga.*

4-6 Ae' Jon anda' basef ifimba ma ipa' Kristen pagape walemb 7-pelailimbi itap lu'upa Esiai. God fowa' gani nape, dei' nape, anaf owagama nope atapina dondol. Ae' a'i anen noloma Jisas Krais

* **1:1** Dan 2:28-29; Re 1:19, 22:6 * **1:2** Re 22:7,10 * **1:3** Eks 3:14-15; Re 1:8, 3:1; Re 4:5,8, 5:6; Re 11:17, 16:5; Jo 18:37; Kl 1:18; Sam 89:27; Re 3:14, 17:14; 1 Jo 1:7, 4:10; 1 Pi 2:5,9; Re 5:10, 20:6

moloma Ambal bu'unai Godi banagonai si'i ambagof bu'wagufi 7-pelaiguf mope felefele'ma sia bu'wani Godi motopalopepa dowaf mowa' bangaipa mose'epa opalef awanilifi. Jisas Krais anen naila basef ananifi andeande' nanda' hiahawes ananisi datima. Ea' nawalapa basef hiafi Godi andeande'. God nali' nasa'mana nosafel wandof. Ea' nape nali'ma anaf esis sogaga'i God nosa'mas sogosafel wapani. Jisas Krais anen atona dembinai nugumafi amom king dembami magape itapi.

Anen atona okom lu'unai nainaila apa' hia-pai, ma esimbel ananimbeli atembel natagwah-hepa ma waf awafi ape'ifi mataga wahifipa. Anen atona nanda'apa dei' mape dembipai mal-moma mumafi epes hiasi si'i amom dembami king. Ea' nanda'apa mape pris si'i mondolalima Godi manda' maola God Ahamana ananinai. Ae' a'i mogogala'i moloma banagami hiami ananimi atom mogape dondol lifilafi. Endilisi.*

7 Pit, anen banagonai anaf nifi'i noloma otaga esis sotolona naep asasipi ea' epes isimba fowa' sagahaha wamba'wi sotolona wapani. Isimba atis esis amam nematawa misi'ah hiahi sagape itapi sotolona sowa solopana kwapete' ma waf awafi asasifi. Aho', amamba anaf motaga endilisi na'amba.*

8 Dembinai God banagami hiamunai anen na'ias na'amba na'i, "Ae' atowe ape Dembiwai lifilafi dondoli ape agali'i a ape agagi'i endilisi."

Ea' anen anamba atona fowa' gani anen nape,

* **1:4-6** Mt 24:30; Jo 19:34-37 * **1:7** Re 1:4, 15:3; Re 21:6, 22:13

dei' wapani anen nape, anaf owagama a' notanima nifi'i.*

Jon nati Krais, God nandandepana nasapa'ana nagafi'ii

⁹ Ae' Jon sahomepa ipe'iwai. Ae' alomepa, apa' hiapai Jisasi atepa maloma anen sisihipa mape. Akolata alomepa mofa' akafimi ma mugawis nomona maol Godi nope Dembinai nugumafiapa. Ea' ape alomepa ma apa' hiapai magalutu banagepa na'amba atina mogofa' nimanimi. Ae' awalapa basef Godi faloma basef endilisifi ma maol Jisas nanda'ani. Isimba atis dei' esis sandaiwa'me sali'amone ea' afi'i ape ailan agilina sa'i Patmos.

¹⁰ Anef nemaf Dembinaii Sande Ambal bu'unai Godi numafi ae' ea' ame' anagol malogol goga ga'i mehip gandame' si'i sugufapula anona alof, na'i natagai alafuga ae'agai.

¹¹ Ea' na'ipi na'i, "Ina' da'a basefa hiahawes isimba atiasi nigatilisi sil buk. Ea' nenda' basef ifimba fil buk akwamba fefe' fendanda amam nematawa Godi sagape walemb ambalemba bagape 7-pelaigini. Walemb agufilimba ambalemba. Efesus, Smerna, Pergamum, Taiataira, Sardis, Filadelfia a Laodisia."

¹² Ea'ae' andambema a'i iti inimba naga'ipa ae'i. Owa' ati lambeh 7-pelaimbih tol hatoma gol 7-pelaim.*

¹³ La'afena gol amamba ati anona aman nalomambeh nalutu. Anen nandati si'i anona dembinai nataga epen nogofa' alop epesi. Nala klos

* **1:8** Re 6:9 * **1:12** Dan 7:13, 10:5

laumi mowala mambaho'wa bo'wagah ananigahi ea' nowaho' let sanda' gol sanda'atai mafata ananitai.*

¹⁴ Balaga galoma auf fagalonai afitim a'owa' si'i auf fagalo sipsipi a si'i ilagw amamba afitimi. Naep ananimi mogala' si'i nif ileliwa.

¹⁵ Ea' bo'wagah ananimi mogala' gambigambis a'owa' endilisi mandati si'i bras kapa batafunai sagaofam nif lu'wamii. Ea' ame' malogol ananigili nanda'am bendagala mehip si'i embel bagala' lil lil mehip.*

¹⁶ Anen nahapila ondowa 7-pelaiwa nahapilam lagol kwahisigili ananigili. Ea' anona bainat hikalina wa'owa'ili nawisi nepe malogol ananigili. Amaga ananigai gogala' a'owa' banagona si'i awin owaf fagaluwi banagef a'owa'.

¹⁷ Ae' a'i iti anen owa' afa' ewa a'oh felefele'ma bo'wagah ananigahi a' andati si'i sagaga'i. Owa' anen nandome lagol kwahisigili ananigili nahapili na'ipi na'i, "Ina' owa'i ombel mehenaia. Ae' ape dembiwai dondol lifilafi ape agali'i ape agagi'i endilisii.*

¹⁸ Fowa' aga' ea', apa' dei' ina' natolowe ape namowe atapiwi lifilafi. Ea' ape ali' Dembiwai ma igimafi ga' ma egawaloga epes ami sagaga'i sogafe' wambel awambili hel a'a sogafe' wambel bu'wambili heven.*

¹⁹ Ea' Ae' a'i ina' nenda' basefa hiahaom amamba dei' ina' nagatulumi nenda' basefa

* **1:13** Dan 7:9, 10:6; Re 2:18, 19:12; Re 14:2 * **1:15** Hi 4:12; Re 1:20; Re 2:12,16; Re 19:15,21 * **1:17** Ais 44:6, 48:12; Re 2:8, 22:13

* **1:18** Re 1:1

hiahaom amamba dei' magapani a hiahaom anaf migi' mogatagai wapani buk.*

20 Ina' nati ondowa awamba 7-pelaiwa wagape lagol kwahisigili ae'agili a lambeh ambahemba 7-pelaimbih hatoma gol amamba 7-pelaim. Isimba sondola'waifi atis. Basef kofagefa ifimba. Ondowa ondola'waifa ensel mugumafi sios amam nematawa mini'ap Godi, apa' gol amamba mondola'waifa sios amam nematawa Godi isimba 7-pelais.

2

Baseffagafe'ma Kristen sagape Efesusi

1 "Ina' da'a anif basef fefe'ma ensel anamba nugumafi sios amam nematawa Kristen sagape Efesusi. Ae' aman agahapila ondowa awamba 7-pelaiwa lagol ae'agili kwahisigili agafe' la'afena gol amamba lam magatomami 7-pelaimi. Ae' anda'mepago basef ifimba ipa'!*

2 "Ae' egawa hiahawes mais ipa' panda'asi maol ahifini. Nimanimi matagamepa, palutu banagepa atapipa, ina pandahagas, owa!. Ea' Ae' egawa ipa' palutu banagepa endilisi ma pandaiwa'ma isimba sanda' waf awafii. Ea' ipa' pawaloga amam amamba mambaso'am maga'i amom aposeli, pandondomam pegawa amom ina aposel, owa!. Amom magambaso'ami.

3 Ipa' palutu banagepa atapipa ma epes isimba sandaiwa'ma agol ae'agili ma sanda'mepa waf awafii, ina pandahagas, owa!. Ae' egawa ipa' panda' maol ae'ani noma'uni banagambel ea' ina

* **1:19** Re 1:16, 2:1; Re 3:1 * **2:1** Re 2:19; Re 3:1,8,15; 1 Jo 4:1; Re 1:16,20

ombel mahepa pakwahin, owa'atin. Ipa' palutu banagepa pefa' akafimi amamba.

⁴ Apa' dei' a'i i'ipipa anif basef ipa' ma anef waf awafi ipa' panda'afi. Fowa' dambadamba ukup ipe'ipi paipaila Ae' pahapifi andeande', apa' dei' a' owa'atin.*

⁵ Dei' a' ukup pendanda'maf wapani waf afamba bu'wafi fowa' pali' panda'afi. Ea' pembema nelelemb pilaf penda'af pigi'maf wapani si'i fowa' dambadamba panda'af. I'i ipa' owa' pembema nelelemba, atiasi Ae' ifi'i etagamepa ili'amona gol amamba ipe'imi lam magatomami.*

⁶ Apa' dei' anef waf bu'wafi ata' fape ipa' atapif. Anis epes mini'ap Nikolasi Ae' andaiwa'mas endilisi, ipa' wapani pewa' alafugahas pandaiwa'mas a'owa!.*

⁷ "Ipa' mamahipama aligah hagapaipai pendame' andeande' basef ifimba Ambal bu'unai Godi nagawalapefa esis amam nematawa Kristen!

"Epen ami nilutu banagena nelefata wandafa negali'amona waf awafi, bola Ae' i'i aho'man nea' gwa'aisi lawag agamba gagaso'as ambal namili epesi gogotawa aof Godi agiligima Paradaisi."*

Baseffagafe'ma Kristen sagape Smernai

⁸ "Ina' da'a anif basef fefe'ma ensel nugu-mafi esis amam nematawa Kristen sagape Smer-nai. Ae' ape Dembiwai atapiwi agali'i lifilafi, ape agagi' endilisii. Fowa' agaga' ea'i, apa' dei'

* **2:4** Re 2:16,22; Re 3:3,19 * **2:5** Sam 139:21 * **2:6** Jen 2:9; Re

22:2,14,19 * **2:7** Re 1:17

esafel wapani ape namowe ambal lapowe. Dei' anda'mepago basef ifimba ipa' a'i,*

⁹ Ae' egawa nimanimi akafimi amamba magatagamapai ea' Ae' egawa ipa' pape dowadowaf, otamba uga mais akepa. Apa' owa', owa'atin. Ipa' hiahaom hiami endilisimi magape heveni. Ea' egawa basef ifimba awafi esis saga'ipipafi. Amam nematawa isimba sambaso'mepa sa'i, "Afa' Juda." Apa' owa'. Esis ina saila waf Judai, owa'. Esis sambaso'mepa. Esis wambota Satani atis. Ae' egawa hiahawes isimba.*

¹⁰ Ipa' ina ombel mehepama nambimb pegefa' akafimi, owa'i. Ipa' peme'! Atiasi Satan nonda' anipa ipa' penda' kalabusa nogagwamba ipa' ea' pefa' akafimi nimanimi amamba nimaguf ilifunamaif. Apa' kwawia', ipa' pihapifi pilutu banagepa ma anis si'i sehepa pegaga'ma, kwawia', pilutu banagepa pindahapifi. Ama Ae' atiasi egase'epa ambal namili ipa' si'i hiahaom bu'wami esis sanda' pilae sogofa'ami.*

¹¹ Ipa' mamahipama aligah hagapaipai, pendame' andeande' basef ifimba Ambal bu'unai Godi nagawalapefa esis amam nematawa Kristen. Epen ami nilutu banagena nelefata wandafa negali'amona waf awafii, atiasi ga' inimba negafe'ma biafini ina nehambomban nonda'an nefe' wambel awambili, owa'atin endilisi.*

Baseffagafe'ma Kristen sagape Pergamumi

* **2:8** 2 Ko 11:14-15; Je 2:5; Re 3:9 * **2:9** Mt 10:28; 2 Ti 4:8; Je 1:12;
Re 3:11 * **2:10** Re 20:14, 21:8 * **2:11** Ais 49:2; Re 1:16

12 “Ina' da'a anif basef fefe'ma ensel anamba nugumafi sios amam nematawa Kristen sagape Pergamumi. Ae' ahapila bainat launai hikalina wa'owa'ili. Ea' anda'mepago basef ifimba ipa' a'i,*

13 Ae' egawa wambel ipe'imbili. Satan atona ata' nape dembinai ma wambel ambalemba. Apa' ipa' pagahapila agol ae'agili banagipai pagahapifa Ae'i. Ipa' ina pakwaha pagahapifa Ae', owa'atin. Fowa' aman anamba Antipas anen nagawalapa basef ae'afi datima andeande'i. Ea' sahana naga' wambel ipe'imbili Satan nagapoma. Ea' nogota atamba ipa' ina pakwaha pagahapifi Ae', owa'atin.*

14 Apa' Ae' a'i i'ipipa anif basefa waf awafi ipe'ifi dei' ata' fapomepa. Anis amam nematawa sape sagalomepa Pergamumi, esis ata' sahapila waf afamba si'l'i anona aman Balam fowa' nanda'afi sisihif. Waf aman anambai na'amba. Fowa' gani anen nihimba'ma anona aman Balak nam-baso'mana nanda' esis amam nematawa Israelisi sowa sanda' waf awafi. Ea' Balak nasa'mai ukup esis Israeli ma soga' mafisi gwa'aisi isimba sagaso' god baso'amunai, sanda' waf awafi so'a waulafi.

15 Ea' na'amba atin anis amam nematawa sagaloma ipe'i esis ata' sahapila waf afamba awafi anis epes mini'ap Nikolasi banagef.*

16 Ea' ipa' bema nelelemba pekwaha waf awafi ipe'ifi. I'i owa'atin, Ae' felefele' a'i etagamepa epa' eloma epes isimba owa' sombema nelelemb sigafi'mai ae'ia ehas bainat nagape malogol

* **2:12** Re 3:8 * **2:13** Nam 22:1-24:25; Nam 25:1-2; Nam 31:16; 2

Pi 2:15 * **2:15** Re 1:16, 3:11; Re 22:7,12,20

ae'agilii.*

¹⁷ Ipa' aligah hagapaipai pendame' andeande' basef ifimba Ambal bu'unai Godi nagawalapefa esis amam nematawa Kristen. Epen ami nilutu banagena nelefata wandafa negali'amona waf awafii, Ae' bola ese'asa gwa'aisi ae'asi bu'wasi sandambaho' sagape heveni. Gwa'aisi isimba agilisa mana. Ea' ese'asa anemba otamba fasimbai afitimbai atona atin, ea' enda' anagol agol namigili gil otamba ambamba. Ina anin epen negawa agol agalemba, owa'atin. Epen negefa' otam amambai, anin atin negawagol."*

Baseffagafe'ma Kristen sagape Taiatairai

¹⁸ "Ina' da'a anif basef fefe'ma ensel anamba nugumafi sios amam nematawa Kristen sagape Taiatairai. Ae' nogamana Godi, naep ae'api pegala' a'owa' si'i nif fagandif banagef a'owa', bo'wagah ae'agahi hogala' gambigambis a'owa' si'i bras kapa batafini nogogala'.

¹⁹ Ae' egawa ea' ma waf hiafi bu'wafi ipa' panda'afi. Ae' egawa ipa' ukup paipaila Godi epes wapani ea' pagahapifi panda' maol hiani patopalopa epes hiasi. Ae' egawepa palutu banagepa ma nimanimi magatagampai. Ae' egawa maol inimba bu'wani ipa' fowa' panda'ani. Ipa' dei' panda' maol inimba bu'wani hiani pikila' fowa' panda'ani.*

²⁰ Apa' Ae' anif basefa waf awafi ipe'ifi. Ipa' patiti nemata'w akwamba awo'wi Jesebel kwape kwalomepa. Ako'w kwa'i, 'Ae' profet aga'i basef

* **2:16** Eks 16:4,14-15; Jo 6:48-50; Ais 62:2; Re 3:12, 19:12 * **2:17**

Re 1:14-15 * **2:19** 1 Kin 16:31; 2 Kin 9:22; Re 2:14

Godi fandambahi'i.' Apa' owa', kwambaso'mepa kwawalipa ipa' panda' maola ae'i panda' waf so'a waulafi awafi ma paga' gwa'aisi isimba sondolali sagaso' god baso'amunaisi.

²¹ Ae' a'iako'w kombema nembel, isimba atis dei' Ae' ata' animbalow'kwape anif nimaguf, owa' owa'atin. Ako'w ina kwa'i kombema nembel kowa' alafugama waf afamba awafi so'a waulafi, owa'atin.

²² Ea' dei' peme'! Atiasi ikwaho'w kowai belita ese'akwa akafimi lu'wami moloma bumbulita lu'unai. Ea' esis amam nematawa sagaila waf awafi akwa'ufi wapani sofa' akafimi amamba. I'i esis owa' sombema nelelemba sowa' alafugaha waf afamba sanda'afia, bola ese'as akafimi amamba lu'wami.*

²³ Esis isimba sagaila basef akwa'ufi wapani, atiasi ehas soga'. Ama esis amam nematawa hiasi Godi sogogawa Ae' agawalogia nomonas saloma nelelemb epes hiasi andeande'i. Ea' atiasi egwamepa hiahawes ipa' atona atin, sondahama waf ipa'panda'afi.

²⁴ "Dei' Ae' a'i i'ipipa anif basef ipa' anipa amam nematawa pagape wambel Taiatairai, ipa' owa' pigaila basef ifimba awafi akwa'ufia, a owa' pigaila waf afamba sofalaf saga'i, 'Basef fandambahi'i ma waf Satania,' owa'atin. Ae' a'ipipa na'amba. Ae' ina atiasi ese'epa nimanimi daiam wapani ma ipa', owa'!*

²⁵ Apa' waf hiafi bu'wafi ipa' pagagi'mafi, afamba ipa' pindahapilaf tatala'if pefe' ma

* ²² Sam 7:9; Jer 11:20; Jer 17:10; 2 Ti 4:14; Re 20:12-13 * ²⁴ Re 3:11

pegataga nogota Ae' igatagatai.*

²⁶⁻²⁷ Ipa' epes ami pigalutu banagepama wandafa pigali'amona waf awafi ma pila okom ae'ami pefe' pegataga nogota hi'igalata, Ae' atiasi ese'epa banagami ipa'. Ama pegape dembipai ma amam nematawa hiasi hi'igalas. Ea' na'amba atin si'i fowa' Ahame nagase'e banagami ma agape Dembiwai igimafi epes hiasi. Ipa' wapani pepe dembipai pefa' banagami pimafi anis amam nematawa wapani na'amba. Ipa' pimafias banagambel si'i anona aman nahapila kalamuta sanda' ain sanda'atai, si'i anona aman nawala malep papagalap.*

²⁸ Ea' ese'epa ondo'w kuhumbitai'wi lala'wan.

²⁹ Ipa' mamahipama aligah hagapaipai pendame' andeande' basef ifimba Ambal bu'unai Godi nagawalapefa esis amam nematawa Kristen.

3

Baseffagafe'ma Kristen sagape Sardisi

¹ "Ina' da'a anif basef fefe'ma ensel anamba nugumafi sios amam nematawa Kristen sagape Sardisi. Ae' ahapila anagof ambagof bu'wagufi Godi 7-pelaiguf ea' ahapila ondowa awamba 7-pelaiwa.

Ae' egawa waf hiafi ipa' panda'afi. Esis saga'i basefa ipa' na'ambai sa'i, 'Ipa' ambal lagapaipai.' Apa' owa', owa'atin. Ipa' si'i pagaga' ea'i.*

² Ipa' safel dasa'ma pekwaha koh! Waf hiafi awafi ipe'ifi ata' fapaipa atapif fa'i fehepa pega'.

* ^{2:25} Sam 2:8-9; Re 12:5 * ^{2:26-27} Re 22:16 * ^{3:1} Re 1:4,16,
2:2

Apa' anef waf bu'wafi kwaia'uf ipa' pendewa'
banagaf fendape. Dei' main? Waf hiafi ipa'
panda'afi, Ae' ina ati anef ata' usi'if a'owa' ma
naep Ahame Godi, owa!*

³ Ipa' ukup pendapoma basef ifimba ae'afi fowa'
pali' pame'ef pegefa'ef ea'i. Pigi'mif pembema
nelelemb pekwhaha waf awafi pifi'mai Ae'. I'i ipa'
owa' pesafel ulal pekwhaha koha, atiasi Ae' ifi'i en-
dambaho' etagamepa si'i epen nanda' wali nafl'i
nagataga ea' ina pegawa nogota mamahotama ifi'i
egatagamepa, owa!*

⁴ Apa' ipa' anipa pagape Sardisi owa' penda'
luwaguf maim ipe'imi alugumia, atiasi pindawisa
klos afitimi dambaimi atom pefe' peloma Ae'. Dei'
main, ipa' epes bu'upai ea' pandahama amamba.*

⁵ Ipa' paloma anis epes daias wapani sagape
ambal namili lifilafi agof ipe'igufi fail ano'w buk
sa'i buk ambal namili lagapau'wi. Epen nilutu
banagena nelefata negalii'amona waf awafii, Ae'
ese'an luwaguf amamba afitimi nilam. Ea' ina ati-
asi ipati'mas agof asasigufi fagail buk akwambai,
owa'atin. Afil atapiguf. Ewalapa agof asasigufi ma
naep Ahame ae'anai noloma amom ensel ananimi
i'ipam i'i epes isimba ae'asi.

⁶ Ipa' mamahipama aligah hagapaipai pen-
dame' andeande' basef ifimba Ambal bu'unai
Godi nagawalapefa esis amam nematawa Kris-
teni.*

Baseffafe'ma Kristen sagape Filadelfiai

* **3:2** Re 2:5; 1 Te 5:2 * **3:3** Ju 23 * **3:4** Mt 10:32; Lu 10:20; Re
3:18 * **3:6** Ais 22:22

7 “Ina' da'a anif basef fefe'ma ensel anamba nugumafi sios amam nematawa Kristen sagape Filadelfiai. Ae' bu'uwai hilili'i endilisii dei' ahapila ki ma uta atamba fowa' king Devit nagahapilanatai. I'i Ae' egawisi'ata, anona aman ina la'ifina ma nogowalowata, ea' Ae' i'i egowalowata wapani, atiasi anin epen ina la'ifina nigawisi'ata, owa'atin. Ae' atowe a'ipipago basef ifimba ipa'.”*

8 Ae' egawa waf hiafi dei' panda'afi hi'alaf ea' egawa ipa' wapani, ata' banagepa kwasakwasala ma anis epes owa' sogame' basef ipe'ifia. Apa' ipa' apaila basef ae'afi andeande'. Ea' ina pambahoh' agol ae'agili, owa'atin.

“Ipa' piti, ae' anda' uta tagal tapomepa, owa' anona aman la'ifinama nogowalowataea, owa'atin.”*

9 Ipa' peme'! Ipa' pegawa ea' epes isimba Satani. Esis saga'i basef sa'i esis mini'ap Judai, owa' owa'atin. Esis ina saila waf Judai, owa'. Esis sagambaso'ami. Ae' atiasi enda' epes isimba sifi'i sindiwa nembawa sotawa felefele'ma bo'wagah ipe'igahi ma sogogawa ae' okom maimailipa.”*

10 Ipa' paila basef ae'afi andeande' palutu banagepa ma nimanimi amamba magatagamipai. Ea' Ae' dei' imafi ipa' ma atiasi nemaf afamba gwamba motagama mogogwamba amam nematawa hiasi itap hiagomai ma mogawalogasa waf bu'wafi awafii. Amamba ina atiasi motagama ipa', owa'atin.”*

* **3:7** 1 Ko 16:9; Re 2:2 * **3:8** Re 2:9; Ais 45:14; Ais 49:23; Ais 60:14

* **3:9** Lu 21:19; 2 Ti 2:12 * **3:10** Re 2:10,16

11 Ae' ifi'i etagama ipa' kwafalis atis. Waf bu'wafi usi'ifi ipa' pagahapilaf ea'i, hapilaf tatala'if atapipa. Na'amba anona aman nondalombepa hiahaom bu'wami magapoma ipa' ma anaf pegefa'ami.*

12 Epen ami nilutu banagena nelefata wandafa nigali'amona waf awafii, bola Ae' enda'an nilutu banagen si'i olaf fogombalo' ipat lu'unai Godi ae'anai. Ea' epen inimba ina atiasi nekwaha ipat anamba lu'unai netanima nuwisi ando' wapani, owa'atin. Nepe andeande' nomon atapin. Atiasi enda' agol Ahame Godi gila anin goloma agol wambel ambalemba lu'wambili God ae'anaii, Jerusalem wambel namimbili fasimbili. Wambel ambalemba atiasi bekwaha heven God ae'anai nagapoma bisila'i. Ea' agol namigili ae'agili wapani enda'agol gila anin.

13 Ipa' mamahipama aligah hagapaipai pendame' andeande' basef ifimba Ambal bu'wali Godi nagawalapefa esis amam nematawa Kristen."*

Baseffagafe'ma esis Kristen sagape Laodisiai

14 "Ina' da'a anif basef fefe'ma ensel anamba nugumafi sios amam nematawa Kristen sagape Laodisiai.

Ae' kofagewe ma basef endilisifi, ea' awalapef fafe' usi'if basef hiafi Godi. Lifilafi awalapef usi'if datima. Ae' Dembiwai ma hiahaom hiami God nanda'am magape ilif itapi maloma epes hiasi wapani. Ae' a'ipinago basef ifimba ina'.*

* **3:11** Ais 62:2, 65:15; Esi 48:35; Re 14:1, 21:2 * **3:13** Re 1:5, 19:11;
Kl 1:15 * **3:14** Ro 12:11; Re 2:2

15 “Ae' egawa ea' ma waf hiafi dei' ipa' panda'afi. Ea' egawa ipa' ina pohalepa, owa'. A ipa' ina nifipa, owa'atin. Apa' Ae' a'i ipa' pendape pohondalepa a'a pendape nifipa.

16 Owa', owa'atin. Ipa' nifipa kwasakwasala. Ipa' owa' nifipa endilisia o owa' poholepa endilisia. Ea' Ae' andaiwa'mepa a'i igu'upai malogol ae'agili.*

17 Ipa' paga'iasi na'amba pa'i, ‘Apa' moni hianai naloma hiahaom hiami ma'omapa. Apa' ina anin mae akapa, owa'atin.’

“Apa' naep ae'api atilipa pape awepa endilisi, ma anis epes sigati ipa' owahipipa. Ipa' pape kwahupa endilisi, naep pase'epa alop paimipa dowaf. Apa' ipa' owa' pegawa isimba sowalapa waf awafi ipe'ifia, owa’.*

18 Ea' ese'epa nomonas isimba ipa'. Gol ae'ami dei' ea' fandom mataga bo'om a'owa'. Ande-ande'ma ipa' petaloma pegataga be'epa hiahaom hiamipa a'owa'. Andeande'ma petala klos afitimi pelam pigili'ama alop ipe'ipi ma esis ina siti alop ipe'ipi pope wahifip ea' ambagof awagof, owa'. Andeande'ma ipa' petala anin marasin penda'an naep ipe'ipi ma la'ifipama pigati.*

19 Epes hiasi mamahisa Ae' okom magamagailasi isimba Ae' enda' megah mohas ehas kalamuta ma enda' waf asasifi fegataga usi'if. Ea' ipa' wapani ukup pendanda'ma waf ipe'ifi hiafi, pembema nelelemb pekwhaha waf awafi pifi'mai.*

* **3:16** Hos 12:8; 1 Ko 4:8; Lu 12:21 * **3:17** Ais 55:1; Je 2:5; Re 3:5, 4:4; Re 16:15 * **3:18** 1 Ko 11:32; Re 2:5 * **3:19** Jo 14:23; 1 Jo 2:24

20 Ipa' peme', Ae' aha uta alutu. I'i anin open neme' malogol ae'agili ma nusi' uta, Ae' iwis nomon epe eloman ope atogon wea' gwa'aisi.*

21 Epen ami nilutu banagena nelefata wandafa nigali'amona waf awafii, Ae' atiasi i'i aho'ma anina nepe negalome ma negape Dembinai sia king ae'anai. Ea' na'amba atin si'i fowa' Ae' agalutu banagewe ma egelefata wandafa waf awafii. Ea' dei' ape aloma Ahame ae'anai ape dembiwai sia king ananinai.

22 Ipa' mamahipama aligah hagapaipai pendame' basef ifimba andeande' Ambal bu'unai Godi nagawalapefa esis amam nematawa Kristen."*

4

Esis sanda' lotuma God gani heven

1 Isimba hi' alas owa', ati gani heven anota uta tandawisi' tape. Ea' malogol agalemba fowa' agame'agili ga'ipai basef ifimba ae' si'i anona alof nogegal ea' na'i, "Ina' lotai na'a ilifa ihmiba'mina hiahaom anaf mugi' mogatagai."*

2 Ea' kwafalis atis Ambal bu'unai Godi nataga banagona ma ae'. Ea' ati gani heven sia dembinai kingi ati anona aman Dembinai natoman nape.*

3 Anen nogala' banagona si'i otam fasimi agilima jaspa a otam akwahimi agilima konilian. Ea' anona ilelina nanogama sia anamba dembinai king nagatomanaei ea' ati ilelina anamba

* **3:20** Mt 19:28 * **4:1** Sam 47:8; Ais 6:1; Re 4:9; Re 1:1,10 * **4:2**
Esi 1:28

goloto'unai si'i anom otam fasimi agilima emeral.*

⁴ Ea' anom siaifah hiami bu'wami 24-pelaim motawa lif atina sia inimba dembinai kingi. Ea' anom agufumi mala luwaguf afitimi atom matoma mandanda' siaifah isimba 24-pelais. Ea' mowalo' hagw dembami atom mogowalo'agwi balagah amamugahi sanda' gol sanda'agwi.*

⁵ Otaga pele'ala natagai sia dembinai kingi diwala. Ea' anom amalemb lu'wami mala' wapani sia inimba nape nagatologoma bagah 7-pelaim fagandumi mape mogala'mana. Bagah amamba Spirit Ambagof Bu'wagufi Godi 7-pelaiguf.*

⁶ Ea' anamba sia dembinai kingi netawa nagatologoma anin mae atitin nape, inimba si'i embel naoh lu'wami. Ambamba mandati si'i mapelaga ambal magati pelele' endilisi.

Ea' anom hiahaom biamibiam ambal namili lagapaumi mape la'afen managama sia kingi malutu. Amom magape naep hiami mapaoom hi'alam maso'ala amagah opalef amamumi alafugainama hi'alam.

⁷ Nagali'i ambal lagapaunai si'i anona mafin lu'unai wandafunai laion. Nagagi'i anen si'i bulmakau suwafunai. Nagafe'ma wanomi anen amaga gandanda'ana si'i amaga epeni. Ea'nagafe'ma biamibiami nandati si'i anona komon lu'unai nufia' nagafe' ilifi.*

⁸ Apa' ambagof namogof fagapaumi atona atin bihinagof wanogof wanogof fape amom atona

* **4:3** Ais 24:23; Re 3:18, 6:11 * **4:4** Esi 1:13; Re 1:4, 8:5; Re 11:19,

16:18 * **4:5** Esi 1:5-10,22; Esi 10:14 * **4:7** Ais 6:2,3; Esi 1:18, 10:12; Re 1:4,8

atin. Ea' alop amamipi si'ip naep atomap hi'alap. Ea' owamb alip amom maga'i atapim na'amba ma'i, "Dembinai God anen banagona bo'ona hilili' a'owa'i. Fowa' gani anen nape ea' dei' nape, anaf owagama wapani nope atapina."

Amom ina mapoma noma'wa maga'i basef ifimba, owa'. Manda'if atapim.*

⁹ Amam sonahama God nagatoma sia dembinai kingi nagape ambal namili atapina liflaffi. Ea' masa'ma agol ananigili manifelona.*

¹⁰ Ama nimaguf hiafi nogota mamahotama amom manda'as na'amba atin, agufumi amamba 24-pelaim mindiwa nembawa ma nogohnaep Dembinai kingi, nagatoma sia kingi. Ea' amom manda' lotuma anen nagape liflaffi. Amom mowali hagw amamugwi goligw makwahogw mondola'waifa nogape lafela anen Dembinai amamunai. Hagw agwamba gwafe' gowa felefele'ma sia king notawa nagatologoma ea' ma'i,

¹¹ Ina' God afa'inai Dembinai afa'inai.

Ina' la'ifinai bu'winai endilisi ma epes hi-asi sonogahaha ina' sogasa'ma agol ine'igili lu'wagol. Ina' banagini. Dei' main, ina' nanda' hiahaom hiamii. Okom ine'inai atona na'iam nanda'am mataga. Ea' dei' hiahaom amamba hiami amape ambal lapaom."

5

Jon nati ano'w buk sasopama'w kwa'oh

* **4:8** Dan 4:34, 6:26; Dan 12:7; Re 4:2,10 * **4:9** Re 4:9; Re 5:1,7,13;
Re 6:16; Re 7:10,15; Re 19:4, 21:5

¹ Ea' ati aman anamba nagatoma sia kingi nahapila ano'w buk lagol kwahisigili ananigili. Buk akwamba amef mail nomon ando'. Ea' sanda' tep si'i blasta sowa' buk akwamba sisihi'w. Tep du'wanina 7-pelaina sagwindisa'w buk akwamba.*

² Ea' ati anona ensel banagonai noga na'i mehip na'amba na'i, "Epen ami bu'wani ma atiasi la'ifina negahape' tep anamba nagawasi' buk akwambai?"

³ Owa' anin epen atitin nepe hevena a'a itap apa'ea a'a itap apa'e a'a itap gani awin la'ifina negawala buk akwamba negati nomone'wa, owa'atin.

⁴ Ae' ati esis ina ati anin epen la'ifina nigli-palia buk akwamba negati nomone'wa, owa'. Ea' ae' dei' nembel nimanimbila isimba alef ega a'i mehip.*

⁵ Ea' anen agilinai na'ipi na'amba na'i, "Ina' owa'i nelefa! Neme'! Anona aman natagama mini'ap esis Judai, aman anamba ma'una Dembinai nagataga wambota atamba bafamepa Deviti. Anen si'i anona mafin wandafunai laion, nikila' wandafa waf awafi. Isimba atis dei' atiasi anen atona la'ifina ma nogahape' tep inimba 7-pelain nagawasi' buk akwambai nugupalia'w."*

Jon nati mafin sipsip noganai

⁶ Ae' ati amamba biamibiam ambal lagapaumi maloma amom agufumi mape malipa anona mafin sipsip noganai. Anen tol nalutu, nandati

* **5:1** Re 4:2,10; Ais 29:11; Esi 2:9-10 * **5:4** Jen 49:9; Ais 11:1,10;
Re 22:16 * **5:5** Sek 4:10; Jo 1:36; Re 1:4, 5:12; Re 13:8

si'i sagahaha afuna. Anen nalutu felefele'ma sia inimba kingi. Wambawa magataga balagonai, 7-pelaim ea' naep 7-pelaip. Naep ipimba fa'i Spirit Ambagof Bu'wagufi Godi 7-pelaiguf nasapa'am mafe'agon hi'alagon itap apa'e hiagoma.*

⁷ Sipsip anamba noganai nafe' nofa'ai buk ak-wamba kwagape lagol kwahisigili ananigili nagatoma sia inimba kingi.*

⁸ Nofa' buk akwamba ea', hiahaom amamba biamibiam ambal namili lagapaumi maloma agufumi amamba 24-pelaim mindiwa nembawa motawa felefele'ma sipsip anamba noganai. Agufumi amamba hiami atona atin mahapila anin musik si'i gitai naloma anom dis gol si'inama sanda inimba nogoh alogw magami. Sanda inimba alogw ambul mataga malota ilif si'i beten esis amam nematawa Godi.*

⁹ Ea' manda' anof awaf dambaifi na'amba ma'i, "Ina' bu'winai hilili'i endilisi ma nigifa'i buk ak-wamba nagahape' mandof tep amamba hi-ami mogowa'akwi. Dei' main, esis asa-hena nagaga'i, esimbel ine'imbeli batala epes isimba wapani sotambili naso'anas God. Aho', ina' natala esis amam nematawa hi'alasa misi'ah ahamba epes hiasi, diga naninani hianai, alop hiapi ma misi'ah sagape anep itap lu'upa walemb hielimbi ma sogotanimai.*

¹⁰ Ina' nanda'as sataga si'i pris mondolalima Godi

* **5:6** Re 4:2,10 * **5:7** Re 8:3-4, 14:2; Re 15:2; Sam 141:2 * **5:8**
Sam 33:3, 40:3; Sam 96:1, 98:1; Sam 144:9; Re 14:3 * **5:9** Eks 19:6;
Ais 61:6; Re 1:6, 20:6; Re 22:5

ma anen nogape Dembinai ma esis numafias sonda' maol ananini. Ea' esis atiasi sope si'i king dembami sumafi epes sagape itapi."*

Esis sasa'ma agola sipsip noganai

¹¹ Ea' ae' atologon owa' ame' malogof ensel hiami a'owa' sigiambam namba amamuni hiani handet milian tausen, hiami a'owa'. Amom malutu malipa sia inimba kingi maloma hiahaom amamba ambal lagapaumi maloma amom agufumi.*

¹² Amom gigal ma'oh mehip ma'i,
“Anamba ma'una sipsip noganai, fowa' esis sahana nagaga'i. Anen bu'unai hilili'i endilisi ma nogofa' namba agol lu'wagili goloma hiahaom hiami bu'wami otamba uga mais soloma banagami lu'wami a gawa bu'wani moloma banagami mogogala'i. Anen bu'unai hilili'i endilisi ma epes hiasi sogasa'ma agol ananigili sonohasa anen soganifelona.”*

¹³ A'i owa' main, ame' diga ma hiahawes hiasi God nanda'as ambagof fagapaisi hi' alas. Hiahawes sagape heveni ea' sagape itapi, sagape itap ana'e awini saloma sagape naoh embel awini. Aho', ame' hiahawes isimba hiasi sagape anamba hi-agomai sanda' anof awaf na'amba sa'i,
“Dembinai nagape sia inimba kingi naloma sipsip noganai wapani, amom biam mondofa'ago danifal inimba hiani neloma agol lu'wagili

* **5:10** Dan 7:10; Hi 12:22 * **5:11** 1 Kro 29:11; Re 5:6 * **5:12** Re 4:2,10

a mogogala'i banagami. Amom biam mon-dofa'ago amamba nimagufhiafi dondol lifi-lafi."

¹⁴ Ea' hiahaom amamba biamibiam magape nammumi ma'i, "Endilisi!"

Ea' agufumi mindiwa nembawa manda'lotuma God naloma sipsip noganai.

6

Sipsip noganai nahape' tep 7-pelailipa buk ak-wamba

¹ Ea' ae' ati sipsip noganai nahapila buk ak-wamba tep 7-pelailip pogowa'akwi ea' nahape' tep pagali'i. Ea' ame' anona ma amom amamba biamibiami na'i basef diga ananigai gandame' si'i otaga diluluwagala. Anen na'i, "Ina' fi'i!"*

² Ea' atologon wapani, ati anona mafin hos afitinai open nagatomanai nahapila kepa'w. Esis saso'ana anota hat si'i sanda' wandaf sali'amonaif sogofa'agwi. Ea' anen banagona nafe' dei' nali'amona wandaf ea' okom banagem nape nape atapina na'i nogali'amona wandaf hiafi.

³ Sipsip noganai nahape' anona tep nagafe'ma bifi nogowa' buki ea' ame' anona ma amamba biamibiam nagafe'ma bifi na'i, "Ina' fi'i!"

⁴ Ea' anona hos akwahinai nogogala' a'owa'i nataga, anona aman natoma hos anamba. Ea' amom amamba biamibiam maso'ana banagami aman anamba nagatoma hosi. Ea' la'ifinai ma negelefata nogota bu'utai ma amam nematawa itap apa'isi. Ea' esis lupulupa' atin so'oha sogaga'.

* **6:1** Sek 1:8, 6:1-6; Re 4:6, 5:1

Ea' maso'ana anona bainat lu'unai ma nonda'
maol inimba.

⁵ Ea' sipsip noganai nahape' anona tep na-
gafe'ma wanifi wapani nogowa'buki. Ame' anona
ma amamba biamibiam nagafe'ma wanifi na'i,
“Ina' fi'i!”

Ea' ae' atologon wapani ati anona hos
alialinai. Ea' aman nagatomanai nahapila anin
skel si'i ikwaf dondo'ma nowaloga gwa'aisi
nigihimba'masa ikwaf dindi'i dondo'.

⁶ Ea' ame' anef maf si'i anagol malogol ga'i
la'afena amamba biamibiam ga'i, “Ina' nesaho'
anep malep sagala sa'utip witipi ma 3 kina. Ea' ne-
saho' maloh sa'wihi wanoh bali si'i wit nagapaihi
ma otamba 3 kina. Apa' ina' owa'i nehambom-
baga waini wel hi'ilasa, owa'i!”

⁷ Ea' sipsip noganai nahape' tep nagafe'ma bi-
fibifi nogowa' buki, ea' ame' malogol anona ma
amom nagafe'ma biamibiami na'i, “Ina' fi'i!”*

⁸ Ea' atologon wapani owa', ati anona hos
batafunai, aman nagatomanai agol ananigili ga'.
Ea' anona aman nugumafi wambel esis sagaga'i
sagapoma nagi'mana nafi'i. Amom biam atiasi
mowala amam nematawa hiasi sagape itapi so-
taga mini'ap biafip biafipa anis sogowa' banaga
amom biama mogaha anis amam nematawa hiasi
anep mini'ap sogaga'. Ea' amom biam moha anis
soga' bainat amamunai ea' anis nolomohas soga'
a aowas naninani nonda' anis soga' ea' anom
mafis amamba wandafumi magape itapi moha
anis monda'as soga'.

* **6:7** Jer 15:1-3; Esi 5:12,17; Esi 14:21; Esi 33:27

9 Ea' sipsip noganai nahape' tep anamba wapani nagafe'ma wanif bifi nogowa' buki, ea' ati ambagofa anis epes sagaga'i sape lafela anota belita sondolalima Goda. Fowa' epes isimba sagahapifa basef Godi sisihifi asawalapef sa'if sa'ipasefa Jisas Krais nagatopalopas. Ea' isimba sandaiwa'ma Godi sahas saga'!*

10 Amom ambagof amamba ma'i mehip na'amba ma'i,

"King dembinai nagahapila itapi otaga ilifi, ina' nape bo'wena hilili'i, ina' endilisinai! Nohotagw ma'ugw atiasi gofe' hi'ilagw dowaf guli' ma ina' nenda' kotima esis amam nematawa sagape itapi, ma negagwa esimbel ape'imbel?!"*

11 Ea' God nasso'ama anom klos afitimi laumi atona atin na'ipam na'amba na'i, "Ipa' ata' pepoma noma'w kwasakwasala. Anaf esis bousi soha sahin owan isimba ipa' pandao'oma panda' maol atini soga', si'i sahepa pagaga'. Anef nemaf dondo'afi esis bousi sohas soga' sotaga ma ikwaf ae' aga'iefi, dao' egwa esimbel ipe'imbel."*

12 Ea' ae' ati sipsip noganai nahape' tep anamba nagafe'ma wanif wanifi nogowa' buki dei' atef imaua lu'unai nakoto' itap, awin alipini netaga nandambema alialina si'i lowaf alifi apifi. Ea' awin owambini nataga akwahina hi'alana si'i esimbel.*

13 Ea' ondowa magape ilifi mowai itap si'i sa'utip pagail lawah figi owa' ata' akupia fufin

* **6:9** Re 16:7; Diu 32:43; Sam 79:10 * **6:10** Re 3:18, 7:9,13; Re 19:14 * **6:11** Mt 24:29; Ap 2:20; Re 8:12 * **6:12** Ais 34:4

nakoto'mep pigawai.*

14 Ilif wapani a' neafe' higilalagon si'i sala'watefa mat sogowa'ata. Ea' halelef hiami maloma ailan hiani makwaha anamba magapoma a' mindiki'ah mafe' anagon.*

15 Ea' amom king dembami itapami maloma agufumi a amom kepten dembami mugumafi amom soldiai maloma amam hiahaom hiamumi a amam amamba banagami, epes isimba hiasi sanda' maola otambai saloma isimba hiasi agof akasi sagape lafela anis epesi, esis hiasi sawis sandambaho' sagape bologwalef maim magape itapi ea' magape nomona otamba lu'wami magape halalifi.*

16 Ea' sofala halalef amamba hiami maloma otamba na'amba sa'i,

"Ipa' awi pindahapi'i petomapa ma pembaho'wapa ma amaga anen nagatoma sia kingi naloma nembel wandafunai ma sipsip noganai.*

17 Dei' main, nemaf afamba lu'wafi ma ukup amom biami wandaufipa mogogwa waf awafi dei' fagatagai. Atiasi ami la'ifina nilutu nigikila' amamba? Owa'atin."

7

Esis Israel hiasi 144,000-pelais sofa' ametal Godi

1 A'i owa' main, ae' ati hiahawes isimba wapani si'i koh dondo'ah ati ensel biamibiam malutu

* **6:13** Ais 34:4; Re 16:20 * **6:14** Ais 2:10,19,21 * **6:15** Lu 23:30;

Re 4:2,10 * **6:16** Joe 2:11; Nea 1:6; Mal 3:2

wa'owa'ola biafigin biafigin itap pafe' pegetambela, mahapila fufin hiani itapani ma atiasi fufin inimba ina banagena negefapusa itap a'a naoh embel lu'wami a'a negaola anoga lawag atotoga, owa'atin.*

² Ea' ati anona ensel nafe' nalota ilif awin nagatafima. Anen nahapila ametal banagani Godi nagape namunai ea'nofala ensel amamba bi-amibiam God naso'am banagami ma mohambombaga itapi naohi.*

³ Anen na'ipam mehip na'i, "Dei' ipa' ina pe-hambombaga itapi naoh a lawah maim, owa'i. Ata' owa'. Apa' ma'i monda' ametal Godi ma amagah epes isimba bu'wasi sanda' maola God ape'inai mili'. Ama bola dao', pendahambombaga hiahaom amamba."*

⁴ Ea' ame' esis sa'i esis amam nematawa isimba ma'uma'wis sogofa' ametali. Amom manda'mas ametal esis asataga na'amba 144,000. Esis amam nematawa hiasi misi'ah Israeli.

⁵ Dei' esis 12,000 mini'ap esis Judai esis asofa' ametal a 12,000 mini'ap Rubeni a 12,000 esis mini'ap Gati.

⁶ Ea' esis 12,000 mini'ap Aseri a 12,000 mini'ap Naptalii a 12,000 mini'ap Manasei.

⁷ Ea' 12,000 mini'ap Simeoni a 12,000 mini'ap Livaii a 12,000 mini'ap Isakari.

⁸ Ea' 12,000 mini'ap Sebuluni a 12,000 mini'ap Josepi a 12,000 mini'ap Benjamini. Epes misi'ah isimba sofa' ametal Godi.*

* **7:1** Jer 49:36; Dan 7:2 * **7:2** Esi 9:4,6; Re 9:4 * **7:3** Re 14:1,3

* **7:8** Re 3:18

*Esis amam nematawa mini'ap laupi sanda' lotu
ma God*

⁹ Hiahaom amamba hiami hi'alam, ae' ata' atol-
logen wapani owa', ati esis amam nematawa hi-
asi a'owa' safi'i sunduwa'anima sape. Ea' ina
anin open la'ifina nigiamba epes isimba sogataga
ma'uma'wis, owa'atin. Esis a' hias a'owa'. Epes
isimba sagape itap hiagomai ea' epes hiasi sagape
walemb hiagomai ma alop anamba hiana haona,
diga hianai naninani, isimba hiasi hi'alas.

Esis salutu anamba God nagatoma sia kinga ma
naep sipsip noganai. Sala anom klos afitimi laumi,
sahapila akwitih lagof asasigufi.*

¹⁰ Ea' soga sa'i mehip na'amba sa'i,
“God ape'inai anen natoma sia kingi ma sipsip
noganai, amom biam mofa'apa mutanimai ma
makwaha waf awafi ape'ifi mogape andeande'.”

¹¹ Amom ensel amamba hiami mandatama
hi'alam malutu managama sia kingi ea'
agufumi amamba 24-pelaim maloma hiahaom
amamba biamibiam magape namumi mape
mitimalo' mindiwa balagah amamugahi mati
itap felefele'ma sia kingi manda' lotu mandagala
ma God.*

¹² Amom maga'i na'amba ma'i,
“Endilisi atis! Apa' mandagala a'owa' ma God
ape'inai ea' masa'ma agol ananigili lu'wagol!
Anen Dembinai kofagonama mogogala'i. Anen
nomonas hiasi bu'wasi sagapaunai ea' apa' man-
ifelona masa'ma agol ananigili! Anen banagami
hiamunai endilisi! Aho', banagami lu'wami a'

* **7:9** Re 4:2,10 * **7:11** Re 5:12, 11:17

mapoma anen! Amamba hiami ananimi atom lifilafi dondol. Endilisi!"*

Akafimi esis mini'ap apambai ahi'alam dei'

¹³ Ea' anona amom agufumi amamba 24-pelaim nahali'i na'i, "Esis isimba sagala klos afitimi laumii, esis mamahisa? Esis safi'i anima?"*

¹⁴ Ea' agwa basef a'i, "Dembinai ae'inai, ina' atina negawas."

Anen na'ipi na'i, "Epes isimba fowa' sape itap sogofa' nimanimi akafimi lu'wami ma lagof esis bousi. Ea' esis sasa'opa klos asasimi ma esimbel sipsip anamba noganai, dei' mataga afitim.*

¹⁵ Ea' salutu sia king Godi nagatologoma. Ea' owamba alip sanda' maol ananini ipat ananitai. Ea' anen nagape sia inimba kingi, anen atona atiasi nope nolomas nola'ambemas.*

¹⁶ Esis ina atiasi nolomohas wapani, ina atiasi soga'ma embel iap pese'as wapani, owa'. Owaf ina atiasi banageffehas, a ina atiasi anif niflu'wafi fihiji'as sope, owa'atin.*

¹⁷ Dei' main, sipsip noganai nalutu felefele' endilisi ma sia kingi, anen atiasi nope numafias. Anen no'was sefe' ma embel amamba magataga anona bolotaf ifatai ma sogofa' embel ambalemba ambal namili lagapaimbeli. Ea' atiasi God nopati'mas embif hiafi naep asasipi ma esis ina ata' selef wapani, a' owa'atin."

* **7:12** Re 3:18 * **7:13** Mt 24:21 * **7:14** Re 4:2,10 * **7:15** Ais 49:10 * **7:16** Sam 23:2; Ais 25:8; Jo 10:11; Re 5:6, 21:4

8

*Sipsip noganai nahape' tep anamba nagafe'ma
7i*

¹ Ea' sipsip noganai nahape' tep anamba na-gafe'ma 7i nogowa' buk akwambai ea' ina ata' anin mae atitin nanda' amalemb, a ina anif basef fatagai heven fape fafe' fafe' ma nogota si'i awa du'wanini, owa'atin.*

² A'i owa' main, ati ensel amamba 7-pelaim atapim magalutu naep Godii mofa' biugel anamba 7-pelain nandandam.*

³ Ea' anona ensel nafi'i nalutu felefele'ma belita sondolali ma Goda. Nahapila anota plet gol ama nonda' nogoh alogw fasimi magami. Esis saso'ana sanda hiani ma nonda' nogoh amamba ma anen nokolasom mogaloma beten amam nematawa hisasi Godi. Ea' nanda' ofa ma God belita atamba sanda' gol sanda'atai togotawa felefele'ma sia kingi.*

⁴ Ea' nogoh magataga sanda inimba alogw gwaga'ani naloma beten esis amam nematawa Godi, isimba sandakolas salota ilifa naep Godi.*

⁵ Ea' ensel anamba nofa' plet atamba doko' sanda inimba nagalatai ea' nofa' nifa belita sondolima Godatai nowalam plet, ea' nak wahis suwai itap. Anen nak wahisi ma ea', otaga holala bendagala owa', anom amalemb mala' ea' pele'ala nafe' itap bolatin nalemb atin nape.

Ensel biamibiam mufapula biugel amamuni

* **8:1** Hab 2:20 * **8:2** Re 5:8; Eks 30:1-3; Re 9:13 * **8:3** Re 5:8

* **8:4** Lev 16:12; Eks 19:16-19; Re 4:5, 11:19; Re 16:18

6 Ea' ensel amamba 7-pelaim mahapila biugel inimba 7-pelain mandandombola mugufapula biugel inimba.*

7 Ensel nagali'inofapula biugel ananini ea' ais afitimi banagami si'i otambai pohagalami maloma nif mandambema maloma esimbel lo'lam mataga na'a heven ea' mafe' mowai itap. Amom mawaloga itap hiagoma paloma lawah hiagahi sataga wanifiggin. Ea' nif fando itap wa'ap ea' biafigin nape. Ea' otalef hielifi fagaluwi afalemba wapani ea' fandelef hi'alalef dombol.*

8 Ea' ensel anamba nagafe'ma bifi nofapula biugel ananini, esis sakwaha anona maena si'i halafuta fagandonai nandagia nafe' nowala naoh. Ea' sawala naoh mataga wanifiggin ea' wa'am mandambema mataga esimbel biafigin mape bo'om.

9 Ea' siamba hiahaom amamba hiami magape naohi ambagof namugufumii sawalogam mataga misi'ah wanoh ea' anep mini'ap maga' biah hape bo'oh. Ama main, siamba sip hiapi pagafe' naohi wapani sawaloga pataga misi'ah wanoh ea' anep mini'ap awasim hi'alam biafim mape bo'om.

10 Ea' ensel anamba nagafe'ma wanumi nofapula biugel ananini, anona ondo'w lu'unai nandagia na'a heven fandonafafal atin si'i nemba'w fagando'w nowai itap. Esis siamba walembeh hiambihi haloma embel hiambeli begetah itapi sawalogas sataga wanifis ea' ondo'w anamba nafe' nowala embel du'wanimbrel begetah wa'ili. Wa'ol biafis owa' sape be'es.*

* **8:6** Eks 9:23-26; Esi 38:22; Joe 2:30 * **8:7** Eks 7:20-21 * **8:10**
Jer 9:15

¹¹ Ondo'w agili'wa akwamba sa'i, Marasin Inimba Numbutini. Ea' siamba walembeh embel hiambeli sawalogambel bataga mini'ap wanifip, ea' anembel anep mini'ap bataga si'i marasin numbutini. Apa' mini'ap biafip bape be'embel. Ea' epes hiasi sa' embel ambalemba aumbeli baofa opalef asasimi saga' hi'alas.*

¹² Ea' ensel anamba nagafe'ma biamibiami nufapula biugel ananini, esis siamba awin owambini alipini naloma ondowa sawalogas sataga misi'ah wanoh. Ea' sahambombaga mini'ap atetep sataga akutis. Ea' nemaf afamba satopa'af nohotagw wanifigw. Anota akutita, biafigw gogala'. Ea' dei' awin alipini du'wanin owa' negala'a. Ea' owamb du'wanimb na'amba atin.*

¹³ Ea' ati anona komon lu'unai nufia' nafe' la'afen gani ilif ame'ana na'i mehip na'i,

"Uwahipis uwahipis a'owa' esis amam nematawa sagape itapi ma anom akafimi nimanimi lu'wami wapani mogatagamas. Dei' main, anom ensel wanom ma'i mufapula biugel amamini ma atiasi nimanimi akafimi amamba mogatagamas!"

9

Ensel nagafe'ma wanif bifi nufapula biugel ananini

¹ Ea' ensel anamba nagafe'ma wanif bifi nufapula biugel ananini, ati anona ondo'w nakwaha heven nowai itap. Ondo'w anamba anona ensel. Ea' esis saso'ana ki utaini ma anona nowaga nagal

* **8:11** Re 6:12-13 * **8:12** Re 9:12, 11:14

nogowala itap awini. Nowaga anamba owa' nefe'
nogotambilia nowala nagafe' atini.*

² Anen nawisi' uta nowaga anamba ea' nogoh
lu'wami matagai si'i nogoh magalo nif lu'wamii.
Ea' nogoh amamba malo maso'ala awin ilif, ea'
awin alipini naloma owambini mataga akutim.*

³ Ea' anom asagof si'i kwamu'wis lu'wami mak-
waha nogoh amamba mowala itap. Ea' ensel
anamba naso'am banagami si'i banagami sipi-
awai wagape itapi wagahambombaga epesi.*

⁴ Ea' mofa' basef na'amba fa'i,

"Ipa' ina pehambombaga otalef a'a hiahaom
mamimami magataga itapi, a'a anogah lawah,
owa'i. Ipa' pendahambombagago epes isimba atis
ametal Godi owa' logatoma amagah asasigahia."

⁵ Ea' amamba amom la'ifima mogaso'asa
akafimi epes isimba mefe' mondahama aomb
wanemb biamb, apa' ina mofa' banagami ma
mohas sogaga', owa'. Ea' maso'asa akafimi awami
endilisi ma epes isimba si'i sipiawa wagaha epes
sagame' akafimi lu'wami.*

⁶ Nemaf afamba atiasi epes hiasi solaoma
ufia'wa si'i sogaga', apa' owa', a' owa'atin. Ina
siti ano'w. Ga' atiasi nondafa'mas some' akafimi
lu'wami atapim mopais sope.*

⁷ Ae' ati asagof amamba si'i hos dumbulidom-
bola ma'i mogapa!. Balagahima mandati si'i
hagw dembami atom mogowalo'agwi sanda' gol
sanda'agwi gwatoma balagah amamugahi. Apa'

* **9:1** Jen 19:28; Eks 19:18; Joe 2:2,10; Re 20:1

* **9:2** Eks 10:12,15

* **9:3** Re 7:3

* **9:5** Jop 3:21; Jer 8:3; Re 6:16

* **9:6** Joe 2:4

amagah amamugahi si'i epesi nogohnaep sandanda'am.*

⁸ Balagah amamugahi auf laumi si'i balagah nematawai. Nalelef amamumi si'i nalelef mafis wandafisi laionim.*

⁹ Mafatagw amamumi mala siaogw si'i dunduwif agufum banagami ea' fa'isih amamumi mala' mehip si'i hos magahondo' wilkar lu'wani hiani masagih magafe'ma wandafa amalemb magala'.

¹⁰ Akwagah hailam si'i sipiawa ea' nalelef fetawama mogaha hiasi molas nombota sogame' akafimi. Amamba mape akwagahima. Akwagah amamumi banagami ma mogahambombaga epes aomb ambamba wanemb biamb.

¹¹ Amom anona dembinai king amamunai numafiam. King anamba anen ensel nugumafi nowaga anamba nagal nogowala gani awin a'owa'i, nandafe' atini. Diga esis Hibrui saga'i agol ensel anambai sa'i, Abadon. Diga esis Griki sa'i, Apolian. Kofagefa fa'i, "Aman nogahambombaga hiahaom hiamii."*

¹² Nemaf awafi ma nimanimi lu'wami mugali'ii amom ahi'alam. Ea' peme'! Nimanimi biafim ata' magapanii bola motaga migi'i.*

Ensel anamba nagafe'ma wanom wanomi nufapula biugel ananini

¹³ Ea' ensel anamba nagafe'ma wanom wanomi nufapula biugel ananini, ame' anagol malogol ga'i gatagai belita sondolalima Goda sanda'

* 9:7 Joe 1:6 * 9:8 Joe 2:5 * 9:11 Re 8:13 * 9:12 Re 8:3

gol sanda'atai da'malifitama do'wanido'wan,
togotawa naep Godii.*

¹⁴ Malogol agalemba ga'ipa ensel anamba
nugufapula biugeli na'amba ga'i, "Ensel amamba
awami biamibiam manda' kalabusa walemb
lu'wambi Yufretis, ina' nekwaha amom mofo'o."*

¹⁵ Ea' nakwahom mafe'ma atiasi migiamba esis
amam nematawa hiasi sagape itapi mowalogas
sotaga mini'ap wanifip ea' moha mini'ap atetep
soga', biafip sope be'es. God nanda' ensel amamba
dumbulidombol mape masasa nogota atamba ma
nemaf awin inimba ma afagol agalemba atotogola
monda' maol inimba.

¹⁶ Ae' ame' soldia hiami a'owa' 200,000,000-
pelaim matoma hos amamumi. Ame' siambam
mataga hiami a'owa'.

¹⁷ Ape si'i koh danda'aha agati amom magatoma
hos. Amom soldia mala siaogw kapaimi atom.
Siaogw agwamba akwahimi alimi kolotuwaimi
maloma batafumi. Balagah hosim si'i balagah
mafis wandafumi lu'wami laionim. Ea' nif fan-
dom nogoh mataga otamba batafumi salfa fan-
dom mataga malogof amamugufi ea' felegatam
mafe'.

¹⁸ Amom miamba esis amam nematawa hiasi
mawalogas sataga mini'ap wanifip ea' maha atifip
a' afisa hiahaom amamba awami wanifim, nifi
nogoh maloma otam salfa fagandumi magataga
malogof hos. Apa' mini'ap biafip sape be'es.

¹⁹ Banagami hosi mape malogofi andoh ama-
mumi. Dei' main, andoh amamumi si'i ugufi,
balagah mandanda'am. Ea' dei' mahambombaga

* **9:13** Re 16:12 * **9:14** Re 8:7-12

epesa andoh amamba amamumi.*

²⁰ Anis epes hiasi ina afisa hiahaom amamba awami wanifim, ina sambema nelelemba sakwaha waf awafi, owa'atin. Esis ina sowa' alafugaha hiahaom amamba sanda'am lagof asasigufi, owa'. Aho', esis ina dei' sakwaha waf afamba sanda' lotuma ambagof awami maloma god anamba baso'amunai sanda' goli silva a bras otamba a lawah hiami maim sanda'ami, hiahaom amamba ina magati o malutu magafi'i, magame' basefi, owa'atin.

²¹ Epes isimba sagaha anis epes sagaga'i, sanda' naohi ufiali ea' sagaila waf so'a waulafii, sanda' wal atini. Apa' ina sambema nelelemba sowa' alafugaha waf afamba, owa'atin.

10

Anona ensel naso'ana buk Jon na'akw

¹ Amamba hi'alam ea', ati anona ensel banagonai nisila'i heven. Anen nandagigil nambaho' alop ananipi ilagw ea' ilelina nape balaga ananigai. Amaga ananigai gogala' si'i owaf ea' bo'wagah ananimi si'i popa'w fagandona.

² Anen nahapila ano'w buk sa'ukwi lagof ananigufi, akwindiatif kwa'oh. Anen nawamona bo'waga ananigai kwahisigai gatoma naoh a egawa nahaponaga itap wata'ita.

³ Ea' nogal mehip endilisi si'i mafin lu'unai laion nagalef. Nalef na'amba ma ea', otaga diwala hiafi 7-pelaif. Ga'i si'i anagol malogol.*

* **9:19** Re 16:9,11; Ais 2:8,20; 1 Ko 10:19-20; Sam 115:4-7; Sam 135:15-17; Dan 5:23 * **10:3** Dan 8:26; Dan 12:4,9

4 Otaga diwala 7-pelaif ga'i basef ea', a'i enda' anif basefa isimba, owa' ame' anagol malogol ga'i gataga heven ga'i, "Basef ifimba otaga diwala hiafi 7-pelaif, isimba ina' nembahō'was sondape okom ine'imi atom. Ina nenda'ef fil buk, owa'i.*

5 Ea' ensel anamba ali' agatolona nagalutu naohi itap wata'itai anen NASA'ma lagol kwahisigili galota.*

6 Ea' na'ias endilisi gani ilifa agol Godi nagape namona lifilafi dondoli. Anen nanda' ilifi itap naloma hiahaom hiami ambagof fagapaumi maloma amamba ambagof akami magape ilifi itapi maloma naoh embel lu'wami maloma hiahaom amamba hiami magape naoh owin wapani.

Ea' ensel anamba na'i, "Nogota mape magasastai dei' a' hi'alata.*

7 Nemaf afamba ensel anamba nagafe'ma 7i ni'i nugufapula biugelafi, hiahaom amamba God nagambaho'ami motaga alihim. God atiasi nonda'am endilisi si'i basef fowa' nagaso'amef amom profet manda' maol ananinii."

8 Ea' malogol fowa' agame'agol heveni ga'ipi wapani na'amba ga'i, "Ina' fo'o fa'ai buk akwamba kwindiatif kwagape lagol ensel nagalutu naohi itapi."*

9 Ea' afe'ma ensel anamba a'ipana a'i, "Ina' se'e buk akwamba sa'ukwi."

Ea' na'ipi na'i, "Ina' fa'akw nea'akw. Ako'w atiasi usihi'w si'i aupimbel malogol ine'igili, apa' nembel ine'imbili a'ikahi'w."

* **10:4** Diu 32:40; Dan 12:7 * **10:5** Nia 9:6; Sam 146:6 * **10:6**
Dan 9:6,10; Emo 3:7 * **10:8** Esi 2:8, 3:1-3

10 Anen na'ias ea', asa'ma buk akwamba sa'ukwi lagol enseli a'akw. Ea' malogol ae'agili usihigil si'i aupimbel hani. Apa' a'akw ea' ame' ikahi'w nembel ae'ambili.

11 Ea' ame' anif basef sa'ipi sa'i, "Ina' newalapa basef Godi wapani ma hiahaom atiasi mogatagama misi'ah amam nematawa alop naninani hianai ma diga anamba hiana haona ma amom king dembami hiami wapani."

11

Amom biam magawalapa basefi

1 Ea' esis sase'e bagol ae' ma indila'waifa hi-ahawes dondo'as atin ea' sa'ipi sa'i, "Ina' safel nembe' ikwafa ipat lu'unai Godi noloma belita atamba sondolalima Goda. Ea' niamba esis amam nematawa sanda' lotu ma anini sataga ma'wis.*

2 Apa' ina nenda' indalelemb ambalemba bepe ando'ma ipat anamba, owa'i, hapaimi. Dei' main, indalelemb amambai esis epes sogolalama Godi sofa'alemb. Ama esis atiasi sotaga sogahambombaga wambel lu'wagoma Godi bu'wambili sope sofe' sondahama aomb 42-pelaimb, afagof si'igufi wanogof du'wanigili.

3 Ea' atiasi ae' God esapa'o amam amamba biam ae'ami enda'am banagema mogowalapa basef ae'afi. Ea' amom atiasi mowaho' begah wa'ami si'i luwaguf awami ea' mi'ipasa basef ae'afi mofe' mondahama nimaguf 1,260-pelaif, afagof wanogof du'wanigili."*

* **11:1** Lu 21:24; Re 12:6, 13:5; Esi 40:3; Sek 2:1-2 * **11:3** Sek 4:3,11-14

4 Amom biam si'i lawah oliv biagah haloma lambeh biambeh atapis sotawa naep Dembinaii ma itap hiagomai.*

5 I'i anis epes si'i sonda' amom biam aom, atiasi nif fetaga malogof amomugufi ea' fendo esis bousi amamisi endilisi. Aho' endilisi, epen ami ni'i negahambombagami, waf afamba atef anin a' nega!.*

6 Amom biam banagema mogasopama otaga ma asaf owa'atina nimaguf hiafi ma monda' maol mogawalapa basef Godi. Amom banagami ma mogambema embel hiambeli begataga akwahimbel si'i esimbel ea' banagami ma mogahambomba esis amam nematawa itapasi ma hiahaom awami mamimami. Nimaguf mamahifa amom mi'l i monda'as na'amba, amom la'ifima monda'as.*

7 Amom manda' maol mawalapa basef Godi ma ea', anin mafin lu'wani aunai nokwhaha nowaga anamba nagal nogowala atini a' nondagiai ilif. Ea' okom numbutina nopa' nolomam. Ea' noham nofa'asom a' afum.*

8 Ea' alop amamipi po'oh ufia'w lu'ukwa taun anamba lu'wagoma, apa' maga'iagon loo atin maga'i agol Sodom Isipi. Anamba ea' taun inimba atin fowa' esis saha Dembinai amamunai nagaga' lawag usi'igai ti'wanaegaima.

9 Anis epes alop hianai naninani sagape wambel itap hiagomai a diga hianai naninani, epes misi'ah

* **11:4** 2 Sml 22:9; 2 Kin 1:10; Sam 97:3; Jer 5:14 * **11:5** 1 Kin 17:1;
Eks 7:17-20; 1 Sml 4:8 * **11:6** Dan 7:21; Re 12:17; Re 13:1,7, 17:8

* **11:7** Lu 13:34

hiasi hi'ilas atiasi sititi alop amom biami atapis sondahama nimaguf wanif si'ifi du'wanifi. Ea' esis ina si'i aho'ma anis epes sogawam matmat, owa!.

¹⁰ Ea' esis amam nematawa itapasi atiasi sondagala ma amom magaga' asonda' gwa'aisi sea'as sealemb a sandasoso'ama hiahawes fasisi saloma alipisi asasisi. Dei' main, profet amamba biam maso'asa akafimi awami amam nematawa hiasi sagape itapi.*

¹¹ Nimaguf si'ifi wanif du'wanifi ahi'ilif, dao' God a' nosapa'i ambip ambal lagapaipi pefe' piwis nomona amom biam a' mosafel mulutu. Ea' epes sotolom, a' ombal mahas endilisi.*

¹² Ea' mome' anagol malogol gi'i gotagai heven gofalam mehip na'amba gi'i, "Ipa' bipa latai na'a ilif!"

Ea' mofe' heven muwis ilagw nomon ea' esis bousi sulutu sotolona mogafe!*

¹³ Ama nogota atamba atota, imauna lu'unai a' notaga ea' taun lu'wagoma du'wanigin pe'ogon ea' 9-pelaigin ata' nope atapigin. Ea' esis amam nematawa 7,000-pelais soga' ma imauna anamba. Apa' esis anis amam nematawa sogapani esis ombal mahas a'owa' endilisi, sosa'ma agola God nagape heveni.*

¹⁴ Hiahaom akafimi lu'wami mogafe'ma bifi amamba a' mefe' hi'ilam, apeme'! Nogota bandata ma nimanimi lu'wami mogafe'ma wanifi mogataga.*

* **11:10** Esi 37:5,10 * **11:11** 2 Kin 2:11 * **11:12** Re 8:5, 16:18

* **11:13** Re 9:12 * **11:14** Eks 15:18; Sam 10:16; Dan 2:44; Oba 21

*Ensel anamba nagafe'ma 7i nufapula biugel
ananini*

¹⁵ Ea' ensel anamba nagafe'ma 7i nufapula biugel ananini, ea' anagof malogof foga fa'i mehip fatagai heven na'amba fa'i,

"Dembinai ape'inai naloma Krais amom biam dei' mofa'banagami mataga king dembami itap apa'e hiagoma mumafiagon. Ea' anen a' nope king Dembinai lifilafi dondol!"*

¹⁶ Ea' amam amamba agufumi 24-pelaim magatoma sia lu'wani amamini ma naep Godii mape itap mindiwa balagah amamugahi mati itap manda' lotu mandagala ma God*

¹⁷ ma'i,
"Dembinai, ina' God banagami hiaminai. Fowa' gani endilisi ina' nagapani, ea' dei' ina' nape. Ina' nefabananagami hiami ine'imi ea' nape king Dembinai nugumafi epes soloma hiahaom hiamii. Ea' afa' wanifelina.*

¹⁸ Esis sogolalama Godi opalef awalef ukup numbutip, apa' dei' okom ine'imi wandafumi mataga ea'. Dei' nemaf ina' negawalogea sagaga'ii ma sogatagama kot. Dei' nemaf ina' nogaso'asa hiahaom fasimi ma amom profet manda' maol ine'ini. Dei' ina' nogaso'asa hiahawes fasisi esis amam nematawa ine'isi soloma isimba hiasi sanda' lotuminai sagape lafela ine'i, esis agof fagatomasi soloma isimba agof akasi wapani. Dei' nemaf ina' negahambombaga epes isimba sagahambombaga epes sagape itapi!"*

* **11:15** Re 4:4,10 * **11:16** Re 1:4,8, 15:3 * **11:17** Sam 2:1, 46:6;
Ro 2:5; Re 10:7, 19:5; Re 20:11-13; Sam 115:13 * **11:18** Hi 9:4; Re 8:5, 15:5; Re 16:21

19 Amom ma'ias ea' ma main, ipat lu'unai Godi nagape heven nandawisi' ea' bokis bu'wasi isimba mu'uli Godi nagapaisi isimba sataga sa'oh alihigima nomon ipat ananinai. Ea' holala otaga nogala' nafe', amalemb mala' otaga diluluwala, itap nalemb atin assaf lu'wafi wambawa lu'wamunai si'i otamba mambip nalai.

12

Nemata'w kwaloma kwambon lu'unai

1 Ea' anona ametal lu'unai nataga heven nandanda' na'amba. Ano'w nemata'w atoto'w kwape kowaho' awin alipini alop akwa'upi si'i lowaf. Ea' awin owambini nape lafela bo'wagah akwa'ugahi. Ea' anota hat awo agofuwai atowa ogowalo'ogwi tatoma balaga ako'ugai. Ondowa 12-pelaiwa wailata.*

2 Ea' ako'w opafu'w kwame' akafimi amamba matagama'wa kogola awani. Ea' kwawal kwalef kwa'oh mehip.*

3 Ea' anin ametal nataga heven nandanda' na'amba. Anona kwambon lu'unai nape. Anen akwahinai ea' balagah 7-pelaigah handanda'ana, wambawa magataganai 10-pelaim. Ea' hagw 7-pelaigw dembami atom mogowalo'agwi gwatoma balagah ananigahi.*

4 Akwaga ananinai nambeha ondowa anona mini'ap gani otaga ilif nakwahom mowai itap. Ea' dei' ondowa misi'ah biah ata' hape gani ilif atapih. Ea' kwambon anamba nafi'i nalutu naep

* **12:1** Mai 4:10 * **12:2** Dan 7:7 * **12:3** Dan 8:10

nemata'w kwa'i kogola awanii, nalutu nohafa
ako'wa ata' kolani atin, ama kwafalis noga'an.*

5 Ea' nemata'w akwamba kola awani aman.
Awani inimba anaf owagama banagena nugumafis
esis misi'ah hiahi amam nematawa hiasi.
Anen banagona nohapila bumbulita ain nope
dambena nugumafias. Ako'w kolan ea', kwafalis
atis esis sofa'an safe'ma sia king Godi a' nape
andeande!*

6 Ea' kwafa' kwafe' anagon wafigima fa-
taupigima. Anamba God a' nagandondombagona
ako'wa. Ama atiasi anis epes sumafiakw
sogaso'akw gwa'aisi ako'w dondo'ma nimaguf
1,260-pelaif, afagof wanogof du'wanigili.*

7 Dei' wandaf lu'wafi fataga heven. Ensel
dembinai Maikel naloma amom ensel ananimi
mapa' maloma kwambon anamba lu'unai. Ea'
kwambon anamba nao'wa amom ensel awami
ananimi magwamama wandaf amom mapa' mal-
omam wapani.

8 Apa' kwambon naloma ensel ananimi amom
ina banagem a'owa' ma mugali'amona wandaf,
owa'. Ea' dei' amom ina ata' mapani gani heven
wapani, owa'atin.*

9 Ea' amom ensel Godi makwahai kwambon
anamba nisila'i. Kwambon anamba fowa' gan-
inai dei' esis saga'i aman aunai Satan. Anen
aman nagambaso'ma esis amam nematawa hi-
asi itapasii. Amom makwahai anen nafi'i itap,
makwahai ensel awami ananimi wapani misila'i

* **12:4** Ais 7:14, 66:7; Sam 2:9; Re 19:15 * **12:5** Re 11:2-3 * **12:6**

Ju 9 * **12:8** Jen 3:1,14; Lu 10:18, 22:31; Re 20:2

malumanai.*

10 Ea' ame' anagol malogol ga'i mehip gatagai heven ga'i na'amba ga'i, "Dei' God ape'inai a' nowambela apa' mutanimai ea', banagami ananimi mataga mandawalap alihigima ea' ma nogape Dembinai king! Ea' Krais, God nandandepana nasapa'ana nagafi'ii anen banagonai nofa' agol lu'wagili ea'. Dei' main, aman anamba nagambaso'ma alipisi sahin owan ape'isii owamb alip na'ipa God ape'inai na'i esis sanda' waf awafi. Apa' owa' dei' amom ensel Godi makwahana nisila'i ea'.

11 Esis alipisi sahin owan ape'isi sofa' banagami ma esimbel sipsip noganaii ea' sawalipasa basef ananifi endilisifi. Esis sanda' waf afambai. Isimba atis dei' silai'ipa wandaf sali'amona boumi ma amamba. Esis ina ukup pa'ipa'i a'owa' ma sogape andeande' itap apa'e, owa'atin. Esis ina ombel mahasa bousi sohas sogaga', owa'atin.*

12 Ea' ipa' hipai pagape heveni, ipa' sonondahepa! Apa' ipa' pagape itapi paloma sagape naoh ipa' embeli, uwahipipa! Dei' main, nimanimi lu'wami ma'i a' motagamepa. Satan a' nisila'o ea' ma ipa', anen okom wandafuna a'owa' endilisi. Dei' main, anen a' nogawa nogota ea' bandata ma nope nonda' maol ananini, ama main owa', ahigiligalana.

13 Amom ensel mowasa'i kwambon lu'unai anamba nisila'i itap dei' nagawa anen ea' nafi'i nape itap ea' nati nemata'w akwamba kogola awani amani natofa'w.*

* **12:9** Jop 1:11; Sek 3:1 * **12:11** Ais 44:23; Ais 49:13 * **12:13**
Dan 7:25, 12:7

14 Owa' saso'akw bihinagof biagof lu'wagufi komonigufa ako'w la'ifi'wa kufia' kogafe' wambel akwa'umbili itap wafigima fataupigima. Ama ata' kogape laogona kwambon anamba lu'unai ma esis sumafia'wa wali'ita solaga'w kofe' kofe' kotambel afagof wanogof du'wanigili.

15 Ea' kwambon anamba lu'unai nagu'wai embel malogol ananigili. Embel ambalemba bataga si'i anemb walemb lu'wambi ea' kolo' atin bafe' bagi'ma ako'w. Kwambon anamba na'i embel amamba mondahago ako'wa kofe' higiligala'o.

16 Apa' owa', itap patopalopa'w na'amba. Malogol itapi nagal alihina na' embel amamba kwambon nagagu'ami malogol ananigilii hi'alambel.*

17 Ea' anen okom numbutina a'owa' ma ako'w ea' nafe' na'i nonda' wandaf noloma anis batawisa'w akwa'usi, esis amam nematawa isimba sagaila mu'uli hiani Godii sawalapa basef Jisasi sagailafi.

18 Ea' kwambon anamba nafi'i nalutu naoh akata.

13

Mafis biam alupumi mataga

1 Ea' ati anona mafin nagail alupi nataga naoh embel. Wambawa magataganai ilifunamaim ea' balagah 7-pelaigah hapaona. Wambawa awamba mowalo' hagw dembami atom mogowalo'agwi gwatoma wambawa gwandandamam. Balagah ananigahi sanda' anagof agof fail fandandama

* **12:16** Re 11:7, 14:12

balagah agahemba. Agof agwafomba kofagegofa na'amba. Basef mamimami awami findiwaimuma Godi.*

² Mafin anamba dei' agatolonai, anen si'i anom mafis lu'wami wandafumi wanom. Anen anona mafin agol lepat ea' bo'walef ananimi si'i bo'walef anona mafin bea, malogol ananigili si'i malogol anona mafin laioni. Ea' kwambon anamba nowa' banaga mafin alupunai ma banagami lu'wami ananimi. Anen nanda' mafin anamba nataga king dembinai ma nugumafi epes hiasi fowa' anen nugumafiasi.*

³ Mafin anamba balagah 7-pelaigah anoga melet tatomaga si'i sagahana afuna ea'i. Apa' balagonama anamba nagambo'ma dei' ea' waf'i'gin, ambo'ona wapani. Ea' epes hiasi sagape itapi sosafel bolalas kwapete'asa mafin anamba alupunai owa' afunaia, sagi'mana.

⁴ Kwambon anamba naso'ana banagami ananimi mafin anamba alupunai. Ea' esis hiasi sanda' lotuma kwambon anamba maloma mafin anamba alupunai wapani sasa'ma agol ananigili sa'i, "Ami nandati na'amba atin si'i mafin alupunai anamba? Owa'atin. Epen a' owa'atin. Ami la'ifina nepa' negalomana? Owa'atin."*

⁵ Ea' dei' God nape natiti mafin anamba gigal na'oh na'i basef awafi findiwaefa God. Anen banagona nape dembinai ma nonda' waf afambai fegape nogota laota aomb ambamba 42-pelaimb, afagof wanogof du'wanigili.

⁶ Malogol ananigili goga na'i basef awafi nanda'

* **13:1** Dan 7:4-6; Re 12:3; Re 17:3,7-12

* **13:2** Re 17:8

* **13:4**

Dan 7:8,25; Dan 11:36; Re 11:2

findiwa God. Anen nanda' agol Godi findiwagola wambel Godi saloma wambota isimba ananisi sagape heveni.*

⁷ Ea' God ata' nape natiti anen ata' banagonama nogasa'ma wandaf nopta' nogaloma esis amam nematawa Godi ea' nalutu nanda' wandaf nahago-fas. Anen nofa' banagami ma kwambon anamba ea' la'ifina ma nogape dembinai king banagonai ma esis misi'ah hiasi hi'ilas soloma diga anamba hianai ma itap anamba wambel hiagoma, alop naninani hiana haona.*

⁸ Ano'w buk ambal namili'wi kwa'oh. Esis sanda' agof epes Godi atis fail buk akwamba ma nogota atamba fowa' gani God nanda' itap apa'e. Buk akwamba sipsip anamba noganai fowa' esis sahana nagaga'i. Amam nematawa hiasi itapasi agof asasigufi owa' fogail buk akwambaia, esis isimba hiasi hi'ilas sonda' lotuma mafin anamba.

⁹ Epen aligah hagapaini, anin nendame' basef ifimba na'amba.*

¹⁰ I'i esis si'i sonda' anin epen nefe' nenda' kalabus, ea' anin nefo'o nendanda'ago kalabus. Apa' i'i esis si'i soha anin epen negaga'ma bainat, dao' anin nendaga'mago bainat. Endilisi waf afambai nimanif atef atiasi fetaga. Ea' ipa' amam nematawa Godi pendape banagepa pindahapila hapif ipe'ini banagen datima.

¹¹ Ea' atti anona mafin alupunai wapani nosafel nawisi itap awin nandagiai ilif. Wambawa biam matagamana si'i wambawa magataga sipsip

* **13:6** Re 11:7 * **13:7** Sam 69:28; Re 3:5, 5:6; Re 17:8; Re 20:12,15;
Re 21:27 * **13:9** Jer 15:2, 43:11; Mt 26:52; Re 14:12

nogami, apa' basefa diga ananigai si'i malogol diga anona kwambon lu'unaii.

12 Mafin anamba nagail alupi na'i nagafe'ma bifi nofa' banagami ma mafin anamba nagali'i ma nugumafi epes hiasi. Ea' nanda' maol banagani ma nogohnaep mafin anamba nagali'i. Anen nanda' maol banagambel ma nonda' esis amam nematawa sagape itapi sonda' lotuma mafin anamba nagali'i, fowa' sahana sa'i nombo'ma nogaga' apa' owa', dei' wafi'ina ea'!*

13 Mafin anamba nagagi'i, anen nanda' banagami lu'wami mamimami. Banagami amamba lu'wami na'amba. Naep esis amam nematawai, nanda' anif nif fakwaha heven fisila'i itap apa'e.*

14 God ata' nape natiti anen nanda' banagami amamba mamimami ma naep mafin anamba nagali'i. Ea' anen nagagi'i nanda' waf afambai ma nagahambombaga esis amam nematawa itapasi. Na'ipas dindinip na'amba na'i, "Ipa' pendomba ambala mafin anamba nagali'i nil anona lawag maina ma pegefela agol ananigili lu'wagol. Mafin anamba nagali'i ea' ma'una anamba fowa' bainat tagahanai, apa' ata' nape namona atapina."*

15 Ea' God nape natiti mafin anamba noganai na'i aho'ma anen naso'ana ambip ambagof fagapapi ma ambal anamba mafin alupunai sagan-dombanai. Ea' ambal anamba noga na'i basef ea' banagona ma noha epes sandaiwa'ma sonda' lotuma anini sogaga'.

16 Ea' mafin anamba nagagi'i dindinapina

* **13:12** Mt 24:24; 1 Kin 18:24-39

* **13:13** Diu 13:1,4; Re 19:20

* **13:14** Dan 3:4-6

nasasapa' epes isimba hiasi hi'alas sonda' anin ametal nepe atin atina esis lagof da'asigufi a'a amagah asasigahi. Ametal epes isimba agufisi soloma epes agof akasi, a isimba otamba hiambaisi soloma isimba wafisi. Ea' anis isimba agof akasi sanda' maola anis daiasi soloma anis agufisi wapani.*

¹⁷ Ea' epes hiasi sofa' ametal inimba ma agol mafin anamba nagail alupi. Apa' anis sofa' anin namba daiana mafin anamba agilinama. I'i epen ami owa' nefo' ametal inimbaia, anin ina atiasi notala hiahawes epesi, ea' esis wapani ina atiasi sotala hiahawes asasisi, owa'atin.

¹⁸ Apa' ukup pendape banagep andeande'ma isimba. Epen ami negegawai anin a' nindamba namba mafin anamba alupunai andeande'. Namba inimba basef waminif atina anona aman. Namba inimba 666.

14

Esis 144,000-pelais sanda' awalef dambailifi

¹ Ae' atologon wapani owa', ati sipsip anamba noganai nagalutu halafuta Saioni ea' amam nematawa hiasi a'owa' 144,000-pelais salutu salomana. Agol sipsip noganai galoma agol ahamana ananinai agof agwafomba fail amagah asasigahi.*

² Ea' ame' amalemb fasilimbi mala' mafi'i gani heven si'i amalemb embel magala' lil atin, si'i amalemb magala' ma otaga diwagala mehip. Ae'

* **13:16** Re 14:9,11; Re 16:2, 19:20; Re 20:4 * **14:1** Esi 1:24, 43:2;
Re 1:15, 19:6; Re 3:12, 7:3,4

ame' amalemb amamba si'i epes sagaha gitai
musik magala!.*

³ Esis sanda' anof awaf dambaifi ma anamba
sia lu'wani Godi netawa nagatiliginima, ma no-
gohnaep hiahaom biamibiam magape namumi
maloma nogohnaep agufumii. Amam nematawa
isimba hiasi a'owa' 144,000-pelais, God natalis
la'afena epes hiasi itapasi, isimba atis la'ifisa so-
gogawa awaf afamba. Ea' ina ata' anis daias
wapani la'ifisa sogogawaf, owa'atin.*

⁴ Epes isimba sape be'es endilisi. Amam ina
manda' waf awafi maloma nematawa, owa'atin.
Mape bo'om. Walemb ambalemba sipsip noganai
na'i nogafe'ma, esis sagi'mana same' basef anan-
ifi sanda' maol ananini. God natalis la'afena
esis amam nematawa hiasi itapasi ea' sape si'i
ofa bu'wani nagali'i God naloma sipsip noganai
mofa'as sogotanimai ma amomi.*

⁵ Esis ina sanda' anif basef kwamaifi baso'aifi,
owa'. Esis basef kofagefa ma waf awafi akas.

Ensel wanom ma'i anifbasef

⁶ Ea' ae' ati anona ensel nufia' nafe' gani ilif.
Nofa'ai basef bu'wafi Godi fegape lifilafi don-
doli ea' nanda' maol inimba ma nogal'ipasa basef
ifimba esis amam nematawa hiasi sagape itapi.
Nawalapefa misi'ah epes hiasi sagape kantri hiani
ganimba itap hiagoma saga'i diga naninanii ma
alop naninani hianai hi'alas.*

⁷ Anen nogal mehip na'amba na'i, "Nogota
tataga ea' ma God nogawalota epes hiasi ma kot.

* **14:2** Sam 149:1; Ais 42:10; Re 5:9, 7:4 * **14:3** Ef 5:27 * **14:4**
Sam 32:2; Sef 3:13 * **14:6** Re 10:6

Ea' ipa' ombel mondahepa ma anen pila basef ananifi, pendasa'ma agol ananigili. Ipa' pendanda' lotuma God, anen nanda' heven naloma itap a naoh embel maloma embel amamba hiami magataga itap awini."*

8 Anona ensel nagagi'mai ensel anamba nagali'i nafi'i na'i anif basef na'i, "Wambel lu'wambili Babilon ambalemba a' awambel ea'! Aho', anen a awagon ea'! Epes sagape wambel ambalembai sanda' esis misi'ah amam nematawa hiasi hi'alasa saila waf anamba sanda' so'a waolanai. Waf asasifi awafi si'i wain banagonai nanda' epes ukup pagaolasi. Wambel anamba Babilon naso'as wain inimba epes hiasi wambel hiagoma sa'am."*

9 Ea' anona ensel nagi'ma amom biam nafi'i. Ensel anamba nagafe'ma wanomi nogal mehip na'amba na'i, "I'i epen ami nenda' lotu ma mafin anamba nagail alupi ma ambal ananinai sagan-dombanai a nef'a' ametal amaga a'a lagof ananisi,"

10 ea' anin atiasi nepe si'i nega' anin wain. Wain inimba basef waminif atina okom wandafunai Godi. God ina nati uwahipin, owa'atin. Anen okom wandafunai lu'una a'owa'. Anen atiasi nese'an okom wandafunai epen inimba ma nogagwa waf awafi. Ama epen inimba negefa' akafimi awami ma nif fagandumi magahihi'asi ma otamba agol salfa nifimi ma nogohnaep amom ensel bo'om hilili'i moloma nogohnaep sipsip noganaii.*

* **14:7** Ais 21:9; Jer 51:7,8; Re 17:2, 18:2,3 * **14:8** Re 13:12-17

* **14:9** Jen 19:24; Sam 11:6, 75:8; Ais 51:17,22; Re 15:7, 16:19; Re 19:20, 20:10; Re 21:8 * **14:10** Ais 34:10; Re 13:12-17; Re 19:3

11 Ea' nogoh gwataga nif amamba maso'asa akafimi epes isimba sanda'lotuma mafin anamba alupunai naloma ambal anamba ananinai. Epes isimba ina atiasi sopoma noma'w owamb alip, owa'atin. Nogoh amamba atiasi molomolota ilif liflafi atapim mogapani.”*

12 Nemaf afamba akafimi amamba mogataga, dao' anis amam nematawa Godi sondalutu bangles. Isimba esis amam nematawa sagaila mu'uli Godii ma sagahapifa Jisas sisihina datimai.*

13 Ea' ame' anagol malogol ga'i gafi'i heven ga'i, “Ina' da'a anif basef na'amba. Esis amam nematawa sahapifa Dembinaii sagaga'i, dei' nimaguf hiafi anaf owagama wapani sonohas!”

Ambal bu'unai Godi wapani na'i, “Aho', esis atiasi sokwaha numa'umi amamba esis sanda'ami ea' sopoma noma'w. Esis ina sope dowaf, owa'atin. God atiasi niti waf bu'wafi esis sanda'afi ea' nogwamasa anom hiahaom fasimi esis. Waf bu'wafi asasifi atiasi fisalias sondawalap.”*

Okom wandafumi Godi si'i waf sogofa' gwa'aisiafi ma itap apa'e

14 Ea' atologon wapani, ati anona otaga afitinnai nape ea' anona maena ambal lagapaunai nape otaga anamba anen si'i anona dembinai nataga epen nogofa' alop epesi. Anen nowalo' hat bu'utai togogala' si'i goli balaga ananigai ea' nahapila anona nogwatop hikakalina endilisii lagol ananigili.*

* **14:11** Re 12:17, 13:10 * **14:12** 1 Ko 15:58; Hi 4:10 * **14:13**

Dan 7:13 * **14:14** Joe 3:13

15 Ea' anona ensel nagape ipat lu'unai Godi nomoni nawisi ando'nofala aman anamba naga toma otogai mehip na'i, "Ina' topa' gwa'aimi amamba magaofi ma nogwatop anamba ine'ina! Dei' main, gwa'aimi hiami itapami maof ea!. Isimba atis dei' nogota ana'e pegala' gwa'aisiatai."

16 Ea' aman anamba nagape otogai nahapila nogwatop ananipi na'i nowali'ap itap, natopa' gwa'aisi sagaofi itap apa'e.

17 Ea' anona ensel wapani nawisi ando' ma ipat anamba lu'unai Godi nagape heveni. Anen wapani nahapila nogwatop hikakalina a'owa'i.*

18 Ea' anona ensel wapani nakwaha belita atamba sondolalima Goda nafi'i. Ensel anamba banagonai ma nugumafi nifi. Nofala ensel anamba nagahapila nogwatopi nofalana mehip na'amba na'i, "Ina' fa'ai nogwatop apamba ine'ipi hikalip a'owa'i, topa' sa'utip gwa'aipi pagao fi pagail mandelef waini itapi, ea' nekolasom mo'oh! Dei' main, gwa'aimi amamba hiami maof ea!"

19 Ea' ensel anamba nahapila nogwatop ananipi nowali'ap itap, natopa' gwa'aimi sa'utip akumi magail mandelef waini ea' natamam motawa. Ea' nasa'ma gwa'aimi amamba nakwahom mowala otam tang lu'unai nomona sogofa'asa wain embel. Amamba mondola'waifa okom wandafunai Godi ma isimba sogosambala basefi.*

20 Ea' saf'a'asa waina otam tang anamba lu'unai nagape ando'ma taun inimba wambel lu'wambili.

* **14:17** Joe 3:13 * **14:19** Ais 63:3; Kra 1:15; Re 19:15

Ea' esimbela maluwi tang ando' kolo'w atin magafe' laogon mandahama 300 kilomita si'i embel walemb mafi'i matef mataga ilif motambel ain nagape malogof amom hosi.

15

Ensel 7-pelaim mahapila hiahaom awasim endilisii mandandam

¹ Ea' ati anin mae banagani natagai heven ea' nomonas hiahawesa anamba. Ati ensel 7-pelaim mape ea' amom mahapila hiahaom awami endilisii mandandama epesi. I'i anaf hiahaom amamba awami hi'igalam ea', ina atiasi ata' anom motaga wapani, a'owa'. Dei' main, hiahaom amamba awami 7-pelaim, amamba okom wandafunai Godi ea' hi'ilana endilisi.*

² Ea' ati anom maefah si'i naoh embel lu'wami mandati si'i glas isimba sanda'as sagaloma nifi. Esis isimba salutu banages sali'amona wandafa waf awafi satalogofa mafin anamba lu'unai nagail alupi naloma ambal ananinai maloma ametal ananini 666, esis salutu naoh agwamba da'malifigwa si'i glas. God naso'as anom musik si'i gita sahapilam.*

³ Esis sanda' awaf Moses nanda'mana maol Godii faloma awaf sipsip noganaii. Awaf afamba na'amba.

"Dembinai, ina' God banagami hiaminai. Maol hiani ina' nanda'ani, anin banagani ea' afa' watilin nomonas salasafe'man hiahias!"

* **15:1** Re 4:6, 5:8; Lev 26:21; Re 15:6-7 * **15:2** Eks 15:1; Re 11:17, 16:7; Sam 92:5; Sam 139:14; Sam 145:17

Ina' dembinai king epes misi'ah hiasii ea'
waf ine'ifi usi'if endilisifi hi'andalaf!*

⁴ Dembinai, ina' atina nandape bo'wena hilili'. Ea' dei' epen ami atiasi owa' ombel mohana ine'a? Owa'atin. Hiasi hi'alas ombel mahasa ina' sanda' lotu ma ina' atina. Ami atiasi owa' nesa'ma agol ine'igilia? Owa'atin. Epes misi'ah hiahi ma gan-imba itap hiagoma atiasi sifi'i sonda' lotu ma ina' atina. Dei' main, waf usi'ifi ine'ifi ea' fataga alihigma fandawalap."*

⁵ Magi'ma amamba magatagai atologon wapani, ati ipat bu'unai hilili'i Godi notawa gani heven. Ipat anamba nagal alihina ati nomon ipat anamba nape sanda' sel sagala'anai God nagapau-nai.*

⁶ Ea' ensel amamba 7-pelaim magahapila hihahaom awami endilisi mandandam mogalalam-onna epesi, makwaha ipat anamba mawisi ando'. Ea' mowaho' luwaguf afitifi be'ef a'owa'i fegegala' endilisii. Mowaho' legw si'i goli managam mefetagw amamugwi.*

⁷ Ea' anona ma amamba biamibiami magape namumi naso'ama dis lu'wami 7-pelaim sanda' gol sanda'ami sandandama amom ensel atona atin. God nagape namona lifilafii atapinai okom wandafunai ananinai nape si'inama dis amamba 7-pelaim.*

⁸ Ea' nogoh amamba mataga mogola'i ma banagami Godi, amamba si'ima ipat anamba Godi. Ea' ina anin epen la'ifina nefe' negawis ipat

* **15:3** Jer 10:6-7; Sam 86:9 * **15:4** Eks 38:21 * **15:5** Re 15:1

* **15:6** Re 14:10 * **15:7** 1 Kin 8:10-11; Ais 6:4; Esi 44:4

anamba nomon, owa'atin. Esis sope sohafa ensel 7-pelaim monda' maol hi'ilana hiahaom amamba awami mahapilam mandandami ata' mili'.

16

Dis 7-pelais okom Godi wandafunai nagapaisi

¹ Ea' ame' anagol malogol ga'i gatagai mehip ipat lu'unai Godi nomon. Anona na'inofala ensel amamba 7-pelaim na'i, "Ipa' pefe' pekolo'wa dis isimba 7-pelais okom wandafunai Godi nagapaisi ma kolo'olam mefe' itap."*

² Ea' ensel nagali'i anamba nafe' nakolo'wa dis amamba ananimi mafe' itap ea' ilambeh mami-mami awasimi endilisi mataga itapa epes isimba ametal anamba mafin alipunai magailasi ma epes isimba sanda' lotuma ambal ananinaii.*

³ Ea' ensel anamba nagafe'ma bifi wapani nafe' nakolo'wa dis ananimi embel naoh lu'wami. Ea' naoh amamba mandambema mataga si'i esimbel epes hiasi sagaga'i. Ea' hiahaom magape nomon naohi ea' maga' hi'alam.*

⁴ Ea' ensel anamba nagafe'ma wanifi nakolo'wa dis ananimi embel walemb lu'wambi baloma anamba embel begetah mahagahiwai. Embel amamba hiami mandambema mataga esimbel.*

⁵ Ea' ame' ensel anamba nugumafi embel naohi walemb hiamii na'i, "Ina' bu'winai hilili' endilisii ea' nanda' kot ine'itai andeande' naila ikwaf usi'ifi atef nawaloga esis sanda' waf awafii.*

* **16:1** Eks 9:10; Diu 28:35; Re 13:12-17; Ais 66:6; Re 16:17; Sam 69:24; Jer 10:25; Sef 3:8 * **16:2** Eks 7:17-21 * **16:3** Sam 78:44

* **16:4** Sam 119:137; Re 1:4 * **16:5** Sam 79:3; Ais 49:26

6 Dei' main, esis amam nematawa hiasi saha amam nematawa bu'wasi hilili'i ine'isi afis saloma profet ine'imi wapani ea' esimbela sasimbeli balo. Ea' dei' naso'asa esimbela epes isimba sanda' waf awafii ma soga'ambel. Ina' nagwamasam dindi'i dondo' mandahama waf awafi asasifi."*

7 Ea' ame' anagol malogol gataga belita atamba sondolalima God atai goga ga'i, "Aho' endilisi Dembinai, ina' God banagami hiami magapainai. Ina' nogawalogga epesa koti ea' kot ine'itai endilisi usi'ita hi'alata."

8 Ea' ensel anamba nagafe'ma biamibiami nakolo'wa dis ananimi ma awin alipini ea' God nape natiti owaf nagaofa epes nif.*

9 Nif amamba lu'wami owafimi nifim a'owa'i ma'epes isimba. Ea' sa'i basef findiwaifi awafi ma God nugumafi hiahaom amamba awamii. Apa' esis ina sambema nelelemba sakwaha waf awafi sogasa'ma agol ananigili, owa'atin.*

10 Ea' ensel anamba nagafe'ma wanom biami nakolo'wa dis ananimi sia kingi lu'wani inimba mafin alipunaii. Ea' akot lu'unai nataga anamba mafin alipunai nagala'ambemagoma. Ea' esis sagail waf ananifii sofa' akafimi awami. Ea' sondofapa afegah asasigahi sondola'waifa sogame' akafimi lu'wami.*

11 Esis ukup papoma akafimi maloma ilambeh asasimi, dei' sa'i basef awafi findiwaifi ma God nagape heveni. Apa' ina sambema nelelemb

* **16:6** Sam 19:9; Re 15:3, 16:14; Re 19:2 * **16:8** Re 9:20-21; Re 16:21 * **16:9** Eks 10:22; Ais 8:22 * **16:10** Re 9:20-21; Re 16:21

sowa' alafugaha waf afamba awafi esis sanda'afi,
owa'atin.*

12 Ea' ensel anamba nagafe'ma wanom wanomi nakolo'wa dis ananini walemb lu'unai Yufretis. Ea' walemb embel bakisi hi'alamba mogandon-domba ufla'w amom king dembamii mugafi'i anamba awin nagatafimai.

13 Ea' ati ambagof awami wanom mandati si'i kwahowa lu'wami matagai malogol kwambon anamba lu'unai naloma malogol mafin anamba alipunai a maloma malogol profet anamba nagambaso'ami.*

14 Ambagof amamba awami endilisi manda' ametal banagami mamimami ma esis sotolom sogogawam. Amom mafe'ma amom king dembami mugumafi epes hiasi sagape walemb hiagomai. Amom ma'i mokolasai amom atogona monda' wandaf nema afamba lu'wafi ma God banagami hiami magapaunai.*

15 "Peme'! Atiasi ae' etagamepa si'i sanda' wali safi'i sagataga. Etagamepa anef nema afamba ipa' owa' pegawa pigal'i igafi'ia. I'i epes ukup kilikala' sope sowaho'luwaguf asasifi andeande'ma owa' so'oha, atiasi esis ina sofe' alop atop wahifip solomas siti alop asasipi ambagof awagof, owa'. Isimbai sonohas."*

16 Ea' ambagof awami makolasai king dembami anagon itap du'wanip diga Hibrui sa'i Armageddon.*

* **16:11** Ais 11:15; Jer 50:38

* **16:13** Re 16:7; Re 19:6,15,19

* **16:14** Re 3:3,18

* **16:15** Het 5:19; Sek 12:11

* **16:16** Re 16:1

17 Ensel anamba nagafe'ma 7i nakolo'wa dis ananimi ea'fufin nofa'am. Ea'anagol malogol ga'i gatagai sia king lu'unai nomon ipat lu'unai Godi ga'i mehip ga'i, "Amamba dei' ea' hi'alam!"*

18 Ea' otaga holala nafe', amalemb mala' ea' otaga diwala imauna lu'unai nataga. Imauna anamba anen lu'unai endilisi ma nimaguf hiafi danda epes sagape itapi ina same' anona imauna nataga lu'una fowa' si'i anamba, owa'atin.*

19 Taun inimba wambel lu'wambili nandawal wanifigin ea' walemb hiagoma a' awagon hi'alagon. Ea' God okom mandanda'ma epes awasi sagape taun inimba lu'wagoma Babiloni, dei' okom ananimi wandafumi manda' esis sa' embela kap wain nagalapi mahas kwapete'as.*

20 Ea' ailan inimba hiani nafa' nafe' higilalan hi'alan ea' ina ata' anota halafuta atotota tape, a' owa'atin.*

21 Ea' asaf wambawa lu'wamunai si'i otamba afitimi nalai nahas. Asaf wambawa lu'wamunai nimanim a'owa'i si'i beg kopi lu'wani atona atin. Ea' sa'ipana awagon Goda asaf wambawa nimaniminai si'i mowai magahambombaga esisi.

17

Nemata'w dembe'wi kwanda' so'a wauli kofa' akafimi awami

¹ Anona ensel atotona la'afena amom ensel 7-pelaim magahapila dis isimba 7-pelaisi nafi'i na'ipi na'amba na'i, "Ina'fi'i! Nemata'w akwamba kwanda' so'a wauli kwatoma embel lu'wami ilif

* **16:17** Re 4:5 * **16:18** Re 14:10 * **16:19** Re 6:14 * **16:20** Eks 9:24; Re 11:19; Re 16:9,11

atiasi kofa' akafimi awami akwa'umi. Ae' a'i ihmiba'mina amamba.*

² Amom dembami king itapami manda' waf hiafi awafi so'a waulafi maloma nemata'w akwamba. Ea' epes itapasi hiasi wapani sanda' waf so'a waulafi saloma'w. Ea' sataga sahaga sagaol si'i epes sa' embel wain banagimbeli ukup pagaelas."*

³ Ambal bu'unai Godi nataga banagona ma ae' ea' andame' si'i koh dondo'ah. Ensel anamba nofa'e afe' itap wafigima fataupigima. Anamba ati ano'w nemata'w kwatoma anona mafin ilif nagail alupi akwahinai. Mafin anamba agof hi-agufi fail alop ananipi hi'alap. Agof agwafomba basef awafi findiwaifi hiafifafifi ma God. Ea' mafin anamba balaghah 7-pelaigah handanda'ana wambawa ilifunamaim matagana.*

⁴ Nemata'w akwamba kwala klos akwahisi bias ina sandati na'amba atin, ea' sosaf naninani gol naloma sosaf esis sanda' otamba sanda'anai naloma bahigis sagalotamam a'owa'i. Ako'w kwa-hapila kap gol lagol akwa'ugili. Ea' waf hiafi awafi fagape kap apamba nomoni afamba. Waf naninani aunai folo'wagalana endilisii ma naep Godi, waf naninani alugunai ma waf anamba so'a waolana ma nemata'w akwambai saloma hiahaom amamba hiami mape si'ima kap apamba.*

⁵ Ea' amef akwa'ufi ma agol akwa'ugili gail amaga akwa'ugai. Agol agalemba basef fandambahi'i faga'i na'amba fa'i, "Taun lu'wagoma Babilon, anamba nondofala ma'ma nematawa hi-

* **17:1** Ais 23:17; Re 14:8; Jer 51:12-13; Re 17:15 * **17:2** Re 13:1

* **17:3** Esi 28:13,16; Jer 51:7; Re 18:16 * **17:4** Re 14:8

awai wanda' so'a wauli ma waf hiafi awafi endilisi
ma itap apa'e."*

6 Nemata'w akwamba kwaha esis amam nematawa Godi sahapifa Jisasi sagawalapa agol ananigilii sagaga'i. Ea' ati ako'w kwa' esimbel asasimbeli k wataga kwahaga kwagaol. Ati ako'w ea' bolale kwapete'e endilisi nomonas salasafe' hiahias.*

7 Ea' ensel anamba na'ipi na'i, "Dei' maina ina' gogolagalasina kwapete'? Na'amba owa'i. Atiasi ihimba'mina basef kofagefa fape fandambaho'ma nemata'w akwambai faloma mafin anamba nogofa'akwi. Mafin anamba balaghah 7-pelaigah haga paunai a wambawa ilifunamim magataganai.*

8 Mafin anamba nagail alupi, ina' natolona ea'. Fowa' anen nape, apa' dei' ina ata' nape, owa'. Ama anaf owagama dao', nokwaha nowaga anamba owa' nowala nogotambilia nondagiai ilif ea' nefe' higililana hi'ilana. Anis epes itapasi Godi ina nanda' agof asasigufi fape buk ambal namili'wi ma nemaf afamba fowa' dambadamba anen nanda' itap, owa'. Amam nematawa isimba atiasi siti mafin anamba nagail alupi agogolalasis kwapete'. Dei' main, fowa' anen nape, apa' dei' owa', ma owagama, dao' anen a' notaga wapani.

9 "Epen ami okom bu'wami magapaini, anin nendegawa hiahawes isimba andeande!. Balaghah agahemba 7-pelaigah basef waminif atina halafutagw 7-pelaigw nemata'w akwamba k wagt omagwi.

* **17:5** Re 18:24, 19:2 * **17:6** Re 13:1 * **17:7** Dan 12:1; Re 11:7, 13:8

10 Apa' balagah agahemba 7-pelaigah waminif atina anom king dembami 7-pelaim wapani. Wanom biam ea' maga', anona dei' nape dembinai numafi hiahawes. Apa' anona ina dei' a' nataga dembinai king, ata' owa'. Bola dao' a' notaga, anen atona ata' nope dembinai nogota bandata.

11 Apa' mafin anamba nagail alupi fowa' naganpani, dei' owa' nogapania, anamba si'i king dembinai anamba nagafe'ma 8i. Apa' anen amom wambota atota naloma king amamba 7-pelaim ama atiasi higilgalana.*

12 “Ea' wambawa amamba ilifunamaim ina' naga'gatolom ea'i, amamba basef waminif atina anom king dembami ilifunamaim. Ina dei' mataga king dembami, ata' owa'. Apa' amom atiasi mofa' banagami moloma mafin anamba nagail alupi, motaga king mope dembami nogota bandata si'i awa atitin.

13 Amom king amamba ma'i basef mandame'maefa ukup atifip pandanda' ma atiasi mogaso' banagami amamba amamumi hi'igalama mafin anamba nagail alupi ma mogame' basef ananifi.*

14 Atiasi mopa' moloma sipsip noganai. Apa' sipsip noganai a' nikila'am. Epes sagaila fala ananinii naloma basef ananifi datimai, isimba a' nandandepas ananisi atis, epes isimba atiasi la'ifisa solomana sigikila' wandaf afambai.”*

15 Ea' ensel anamba na'ipi na'i, “Ina' natolom ea' embel amamba lu'wami nemata'w kwanda'

* **17:11** Dan 7:24 * **17:13** 1 Ti 6:15 * **17:14** Ais 8:7; Jer 47:2

so'a wauli kwagatomami. Embel amamba basef waminif atina esis amam nematawa hiasi misi'ah hiahi afe'usi afe'usi sandakolas sape ea' esis amam nematawa hiasi alop naninani a diga hiana haona hi'alas.*

¹⁶ Ea' wambawa amamba ilifunamaim ina' nagatulumi, amamba moloma mafin anamba ukup amamipi numbutipa nemata'w akwamba kwanda' so'a wauli. Atiasi mofa' hiahawes uga mais akwa'usi ma ako'w ato'w kogape dowaf, alipisi aka'w. Ea' mowalima'w klos akwa'umi moha'w koga' mea' ambegw akwa'ugwi mofa' alop akwa'upi nif fendop hi'ilap.

¹⁷ Dei' main, God atona NASA'ma nomonasa ukup amamipi ma atiasi monda' hiahawes isimba sogataga. Fowa' anen na'ias ea' na'i, Atiasi amom nomonas atifis ea' banagami amamba magape dembami kingi moso'anam hi'ilam mofe'ma mafin anamba nagail alupi. Ea' monda'am na'amba atin mefe' motagama nemaf afamba God nanda'am mandahama hiahawes isimba anen nali' naga'iasi.

¹⁸ Nemata'w akwamba ina' nagatolo'wi, akwamba basef waminif atina taun inimba wambel lu'wambili bape si'i dembinai nape nagali'ma amom dembami king ma itap anamba hiagomai."

18

Wambel lu'wambili Babilon anamba a' awagon

* **17:15** Re 18:8

¹ Magi' magatagai amamba, ati anona ensel nakwaha heven nisila'i. Anen banagami magapaunai endilisi, sosaf ananinai nogala' nanda' itap hiagoma nogala' a'owa!*

² Anen noga na'i mehip endilisi na'i, "Nemata'w akwamba ao'w hi'ala'w. Ako'w basef waminif atina wambel lu'wambili Babilon agol lu'wagilimbili ea' awagon hi'alagon! Dei' nataga wambel awambili ma ambagof awami maloma amiguf awami mapaogon.*

³ Dei' main, fowa' esis wambel ambalambaisi sa'ipa amam nematawa misi'ah hiasi hi' alas sasasapa'as saga' wain asasini numbutini. Wain inimba basef waminif atina waf hiafi awafi so'a waulafi esis sanda'afi. Ea' amom dembami king itapami hiami wapani manda' waf afamba so'a waulafi maloma esis wambel ambalemba. Ea' epes itapasi sanda' maol bisnis sofa' otamba hiambai ma waf naninani aunai esis wambel ambalemba sanda'afi.*

⁴ Ea' ame' anagol malogol ga'i gatagai heven ga'i, "Ipa' amam nematawa ae'ipai, kwaha wambel ambalemba piwisi ando'. Na'amba ipa' atiasi pendao'oma peloma wambel ambalemba pefa' akafimi awami ma waf awafi esis sanda'afi.*

⁵ Waf afamba awafi lu'wif a'owa' endilisi si'i mahanip, fel notawa ilif nagalota gani heven. Ea' God okom mapoma waf afamba.*

⁶ Ipa' pegawa ea' waf afambai nemata'w akwamba kwanda' so'a wauli kwanda'afi. Ipa'

* **18:1** Re 14:8; Ais 13:21; Ais 34:11; Jer 50:39 * **18:2** Re 14:8

* **18:3** Ais 48:20; Jer 50:8; Jer 51:6,45; 2 Ko 6:17 * **18:4** Jen

18:20-21; Jer 51:9 * **18:5** Sam 137:8; Jer 50:15,29; 2 Te 1:6

pegwa waf akwa'ufi dondo'af endilisi piwapanima'w wamafi wapani. Ako'w kwakolefa waf awafi kwanda'af fataga hiaf a'owa'. Ea' pekolefa akafimi awami hiami mikila' akwa'umi ma pegwam mofe' ma ako'w. Ako'w kwambema embel banagimbeli bala kap pa'am. Ea' na'amba atin ipa' awi pekolefa embel banagimbeli pese'akwam ako'w kwea'ama kogame' akafimi awami mogwam mofe'ma ako'w mondogwama.*

⁷ Nemata'w akwamba kwafela agol akwa'ugili atogol kwanda' waf hiafifafifi ma kogape andeande'. Ea' ipa' pendaso'akwa akafimi hiami ako'w, mondahama aligah hagasi'i. Ea' penda'ako'w ma konda' lef atin. Ako'w okom maga'i na'amba kwa'i, 'Ae' ataga ape kwin dembiwai. Ae' ina si'i alifiwai, owa'. Nimanimi ina atiasi motagame ma egalef, owa'atin endilisi.**

⁸ Ea' hiahaom mamimami awami endilisi atiasi motagama wambel ambalemba anef nemafatetef. Aowas hiani notaga ea' epes hiasi atiasi selef kwapete' nolom lu'unai notaga. Ea' nif fetaga fendo wambel ambalemba Babilon hi'ilagon. Dei' main, dembinai God nawaloga wambel ambalemba nagwamasa akafimi awami esis. Anen banagami lu'wamunai banagona a'owa! **

⁹ Amom dembami king itapami manda' waf so'a waulafi awafi maloma ako'w ea' manda' waf hiafi awasif maloma'w. Atiasi amom king amamba miti ako'w fegando'wa nogoh lu'wami motaga'w ea' melef kwapete!*

* **18:6** Ais 47:7-9 * **18:7** Jer 50:34; Re 17:16 * **18:8** Re 17:2; Esi 27:30-35 * **18:9** Esi 26:17; Dan 4:30

10 Atiasi amom ombel moham kwapete' endilisi ma akafimi amamba ako'w kogofa'ami. Mulutu laogona ako'w mi'ias mi'i, "Owahipipa owahipipa a'owa' ma wambel Babilon! Ipa' taun wambel banagonai! I'i owa' main kwafalis atis ipa' pefa' akafimi amamba ma waf awafi ipa' panda'afi!"*

11 Ea' epes sape sanda' maol bisnis itapi atiasi ukup pendanda' ma wambel ambalemba ea' solopagon sope nelelemb nimanilimbagon. Dei' main, ina atiasi anin epen netala uga ananigai wapani, a' owa'atin.*

12 Uga maina anamba, gol fasimi a otamba silva a anom otamba fasifasimi, bahigis suwasuwaimi sagalotamam a'owa'i, luwaguf fasifasifi, akwahifi faffifafi a anif luwaguf silka nigahapilifa kogwafifi ea' lawah amamba hiahaom alogw fasigwi gwagami ea' hiahaom hiami esis sonda' nalelef elefanilif sonda'ami, hiahaom amamba hiami sonda' lawah sagatalogah otamba lu'umbaii sonda'ami a hiahawes sonda' bras mogogala'i fasimi sonda'ami a hiahawes sonda' ain amamba fasimi sonda'ami a anis hiahawes sonda' otamba fasifasimi sonda'asi.

13 Ea' uga na'amba. Lawah nembawa saga'agahi agiligaha sinamon a paura nogoh alogw fasigwini a gris sa'i mer a sanda inimba bu'wani frankinsens a wain naloma wel gwa'aili a plaua waloma wit ea' bulmakau, sipsip, hos maloma karis si'i wilkar maloma epes wapani. Epes isimba agof akasi sanda' maol dowaf sagape lafela anis epesi. Epes isimba anom dembami

* **18:10** Esi 27:36 * **18:11** Esi 27:12,13,22

ma'i esis ina epes bu'wasi. Ea' maso'asas lauguni sotalis si'i sagatal uga mais. Hiahaom amamba hiami esis ina atiasi sotalom wapani, a' owa'.

14 Epes sonda' maol bisnis atiasi si'ipas na'amba si'i, 'Gwa'aisi isimba nelelemb ipe'ilimbi behafe-masa pegefa'asi, isimba hiasi sakwaha ipa' safe' ea'. Hiahaom hiami bu'wabu'wami atom suwasuwaimi otamba maim lu'umbai atemba basam-bagafe'mami maloma sosaf bilas maim ipe'imi hiahaom hiami amamba makwahipa mafe'. Ama ipa' ina atiasi piti amamba mope wapani, a' owa'atin.*

15 Ea' epes isimba sonda' maola bisnisa hiahawes isimbai ma sogofa' otamba hiambai wambel ambalemba atiasi ombel mohas endilisi ma akafimi awami wambel ambalemba begefa'ami. Atiasi esis sulutuwi laogona anamba nelelemb nimanilimb selef sope.*

16 Ea' asi'i, 'Nandasapal, nandasapal a'owa' ma wambel ambalemba lu'wagoma! Fowa' anamba nagala klos sosaf suwasuwaimi afitimi a luwaguf akwahimi mamimami nogofalo'ma alop ananipi ma goli otamba suwasuwaimbai baloma bahigis fasisi sagalotamas a'owa'i.*

17 Ama atiasi kwafalis atis hiahaom amamba hiami otamba moni moloma bilas sosaf maim amamba ea' aom hi'ilam.'

Ea' kepten hiami mugumafi sipi, epes hiasi sogatala sip sogafe' analemb walembi, a epes isimba hiasi sonda' boskru ma sipi, a epes hiasi sonda'

* **18:14** Esi 27:31,36

* **18:15** Re 17:4

* **18:16** Esi 27:27-29

bisnisa maol naoh embeli, epes isimba hiasi sulu-tuwi laogona wambel ambalemba.*

18 Ea' sulutu siti aka'w wambel ambalemba fendembel nogoh mogalembel ea' si'ias na'amba si'i, 'Wambel lu'wambili anima nape nandati na'amba atin si'i wambel ambalemba? Owa'atin.*

19 Ea' esis sola itap sopof balagah asasigahi selef mehip nelelemb nimanilimba wambel ambalemba awagon. Ea' si'i, 'Pandasapal, pandasapal a'owa' ma anamba wambel lu'wagoma! Ama hiami mugumafi sip apambai maloma amom mugumafi sipi ma pagafe' naoh embeli amom matagama otamba hiambai endilisi ma wambel ambalemba. Pandasapal a'owa'. Ama atiasi kwafalis atis anamba a' awagon hi'ilagon!*

20 Ipa' pagape heveni peloma esis amam nematawa Godi, ea' ipa' aposel peloma amom profet, ipa' hipai sonondahepa ma hiahaom amamba dei' magatagama wambel lu'wagoma anambai. Dei' main, God nawaloga anamba ea' nagwa akafimi awami ma anamba. Anen nagwa waf afamba awafi ma wambel ambalemba nali' nanda'mepaf ipe'i.*

21 Basef ifimba hi'alef, ati anona ensel banagonai nofa'ai anom otam atotom si'i owap lu'unai nogokakisa olemb witimbi. Anen nafela owap anamba nakwahona nafe' nowala embel naoh. Ea' na'i, "Ea' na'amba atin atiasi esis sefela

* **18:17** Esi 27:32 * **18:18** Esi 27:30-34 * **18:19** Ais 44:23; Diu 32:43; Jer 51:48 * **18:20** Jer 51:63-64; Esi 26:21

wambel ambalemba lu'wambili Babilon sokwahogon mehip nefe' nowa si'i owap anamba nogowala naoh ama epes ina atiasi sotologon wapani, a' owa'atin.*

22 Ea' gita anamba apa' nagalifi a musik anamba hianai naninani, moloma batagwi biugel, maguf amambai filifalu'wi ina atiasi ata' peme'am wapani wambel ambalemba, a'owa'. Ea' epes isimba gawaisi sanda' maol hiahaomi, ipa' ina atiasi piti epes isimbai sope wambel ambalemba wapani, a'owa'. Maf owap anamba lu'unai nogokakisa olembwitimbi, atiasi ina ata' some' anona wapani wambel ambalemba, a' owa'atin.*

23 Ileli'w lami ina atiasi ata' mogala' mope wambel ambalemba wapani, a'owa'. Ea' malogol aman anamba na'i nogaso' nemata'wi ea' malogol nemata'wi kwa'i kogaso' amani, ipa' ina atiasi ata' peme' esis wambel ambalemba wapani, a' owa'.

Fowa' epes wambel ambalembaisi bisnis sapomas sape dambesi itapasi. Ea' esis wambel ambalemba sambaso'ma epes misi'ah hiasi ma ufi baso'amunai naninani si'i sagandomboma nematawanai.*

24 God nati wambel lu'wambili ambalemba bagaha profet hiami maga' maloma amam nematawa hiasi Godi. Isimba atis dei' kofagema mapoma wambel ambalemba. Ea' epes hiasi sagape itap ana'i esis bousi sahas sagaga'i, kofagema amamba wapani ea' mapoma anamba atogon."

* **18:21** Ais 24:8; Esi 26:13 * **18:22** Jer 7:34, 16:9; Jer 25:10; Ais 47:9 * **18:23** Jer 51:49; Mt 23:35; Re 17:6

19

Esis amam nematawa Godi sandagalama Babilon a' awagon

¹ Sagi' sagatagama sasimbai ame' anom maefah mandame' si'i maguf lu'wami esis amam nematawa hiasi sagape heveni. Esis sa'i na'amba sa'i, "Apa' mefela agol Godi lu'wagol! God ape'inai atona nofa' apa' mogotanimaii. Anen agol lu'wagilinai, banagami lu'wamunai, mogogala'i magapaunai.*

² Basef lu'wafi ma kot, anen nawaloga epesa waf endilisifi usi'ifi andeande' hi' alas. Nemata'w ak-wamba dembe'wi kwanda' so'a wauli kwaspala esis amam nematawa hiasi itapasi ma sanda' waf awafi so'a waulafi saloma'w. Ea' God nanda'ma'w basef. Ako'w kwaha isimba sanda'mana maol Godii saga'. Ea' dei' God nagwama'wa kofagema amamba akwa'umi mafe'ma ako'w."*

³ Ea' esis sakolo'wa maguf wapani na'amba sa'i, "Apa' mondasa'ma agol Godi lu'wagola wambel ambalemba lu'wambili fagandembel nogoh magalo. Amamba a' malo malota ilif liflafi atapim!"*

⁴ Ea' amom agufumi dembami 24-pelaim maloma amamba biamibiam magape namumii mindiwa nembawa motawa manda' lotuma God nagatoma sia lu'wanii. Amom ma'ias ma'i, "Endilisi atis, apa' mondasa'ma agol Godi lu'wagol!"*

⁵ Ama sia lu'wani Godi ea' anagol malogol ga'i gafi'i ga'i, "Ipa' panda'mana maol Godii, ombel

* **19:1** Re 6:10, 16:7 * **19:2** Re 14:11 * **19:3** Re 4:2,10 * **19:4** Sam 22:23; Sam 134:1; Sam 135:1; Re 11:18

mahepama anen pagaila basef ananifi, ipa' epes agof akipai paloma epes isimba agufisi, ipa' hipai pekolata pefela agol Godi!"*

Sipsip noganai naso' nemata'w ea' gwa'aisi lu'wasi sataga

6 Ea' ame' anis maefah si'i basef hiafi fatagama misi'ah amam nematawa hiasi sandatama sagapani. Ea' sape sa'i mimil si'i embel magala' lil atin. Ea' si'i amalemb lu'wami magala'ma otaga diluluwagala, maguf ifimba fa'ias mehip na'amba fa'i, "Apa' mefela agol Godi! Dembinai anen God ape'inai. Anen banagami hiamunai! Dei' anen nataga Dembinai king endilisi ma nugumafi hiahawes hiasi hi'igalas.

7 Dei' apa' sonondahapa mefela agol ananigli. Dei' main, anen Dembinai banagonai. Nema fataga ea' ma sipsip noganai na'i nogaso' nemata'w. Ea' nemata'w anani'wi kwandandombol kwape.*

8 God naso'akw klos afitimi suwasuwaimi mogogala'i bu'wami endilisi. Ako'w kwala amamba ma alop akwa'upi."

Klos amamba afitimi bu'wami si'i waf usi'ifi esis amam nematawa Godi sanda'afi.*

9 Ea' ensel anamba na'ipi na'i, "Ina' da'a basef ifimba. Epes isimba Godnofalas sogafi'mai gwa'aisi lu'wasi ma sipsip noganai nogaso' nemata'w akwambai, isimba esis sonohas."

Anen na'ipi wapani na'i, "Basef ifimba basef Godi endilisifi."

* **19:5** Re 11:15, 14:2; Re 15:3, 21:2 * **19:7** Ais 61:10 * **19:8** Mt 22:2-3; Ap 10:25-26; Re 22:8-9

10 Ea' ae' indiwa nembawa etawa felefele'ma bo'wagah enseli ma enda' lotumana, owa' na'ipi na'i, "Ina' nenda'as na'amba owa'i. Ae' alipuwai ine'iwai aloma ina' naloma sahopena ine'imi, afa' wandao'oma wanda' maol Godi atini waloma esis hiasi hi' alas sagahapifa basef endilisifi Jisas nagawalipasafi. Ina' nendanda' lotuma God atona. Apa' mogawa basef ifimba endilisifi Jisas nagawalapefa ipe'i, ifimba fasa'mai amom profeta mogawalipasa basef Godi."*

Anona aman anen Krais natoma hos afitinai ilif

11 Ea' ati otaga heven nandawisi' nagal, ati anona hos afitinai nape. Epen nagatumonai agol ananigili sa'i, "Epen nugumafi maol ananini ande-ande' datimai, nanda' waf endilisifi atifi."

Anen nagaila waf usi'ifi atefa nogawaloga esis amam nematawa ma kot nanda' wandaфа waf usi'ifi afamba atef.*

12 Naep ananipi si'i nif fagandifi ea' hagw bu'wagwi hiagwi si'i dembami king mogowalo'agwi gwape balaga ananigai. Anif amef fail alop ananipi, ifimba agol ananigili. Anen atotona nogawa agol agalemba, anis daias owa!*

13 Esimbela masa'opa klos ananimi laumi nalam. Ea' esis sofala agol ananigili sa'i, "Basef Godi."

14 Anen nape nagali'ma epes hiasii ea' amom soldia magape heveni matoma hos amamba afitimi amamumi mailana mafe'. Alop amamipi

* **19:10** Re 1:5, 6:2; Sam 96:13; Ais 11:4 * **19:11** Re 1:14, 2:17

* **19:12** Ais 63:1-3; Jo 1:1,14

esis sowaho'mama klos afitimi fasimi endilisi a'owa'i.*

15 Ea' anona bainat hikalina a'owa'i nape malogol nawisi ando'. Ea' atiasi noha esis mini'ap amam nematawa hiasi ma bainat anamba. Anaf anen numafi epes hiasi sagape itap hiagomai. Numafias banagambel si'i nagahapila anota kalamuta ain. Atiasi nofa'asa sa'utip waina otam tang anamba waini, amamba mondola'waifa okom wandafunai Godi, anen banagonai ma hiahaom hiamii.*

16 Anef amefa agol ananigili failana klosi bimbita ananisi. Agol agalemba na'amba. Dembinai kinga amom king hiamii, Dembinai ma dembami hiamii.*

17 Ea' ati anona ensel atotona nalutu felefele'ma awin alipini nape nagatalogoma. Anen na'i mehip na'ipa amiguf hiagufi fufia' fagafe' ilif otagai na'i, "Ipa' pindakolasi pifi'mai gwa'aisi isimba lu'wasi Godi!

18 Ama atiasi pega' ambegwa amom king dembami goloma ambegwa amom kepten mugumafi amom soldiae ea' moloma ambegw amom amamba banagamii a ambegw hosi goloma ambegwa epes isimba hiasi sagatumami wapani. Ipa' atiasi pea' ambegwa epes hiasi, anis agof akasi sanda' maol sagape lafela anis daiasi, a anis agufisi sugumafi anisa maoli, isimba soloma anis hiahawes akasi."*

19 Ea' ati mafin anamba lu'unai nagail alupi naloma dembami king amamba itapami maloma

* **19:14** Re 1:16, 12:5; Re 14:20, 4:8; Re 21:22

* **19:15** Re 17:14

* **19:16** Esi 39:17-20

* **19:18** Sam 2:2

soldia amamumi mandatama mape. Amom ma'i mopa' mogaloma aman anamba nagatoma hosi noloma soldia ananimi.*

20 Anen nanda' mafin anamba nagail alupi naloma profet anamba nagawalapa basef baso' afi nanda'am manda' kalabus. Profet anamba nanda' hiahaom banagami si'i God nanda' ami ma naep mafin anamba nagail alupi. Waf afambai atef nambaso'ma epes sogofa' ametala mafin anamba nagail alupi ea' sanda' lotuma ambal atona ananinai sagandombanai. Mafin anamba naloma profet anamba nagambaso' ami amom biam ata' mape ambagof namogof ea' sowasa' am mafe' nif wandafumi fagandom otam batafumi agol salfa nowaga lu'unai unumuwanima si'i dumbi.*

21 Anom soldia magaila mafin anamba alupunai maloma profet anamba nagambaso' ami, amom ata' mape nomon. Ea' aman anamba nagatoma hosi naha amom a' maga'. Anen naham bainat anamba launai nagape malogol ananigilii. Ea' amiguf hiagufi fa' ambegwa amam amambai ea' nelelemb afafilimbi a' si'im endilisi.

20

Satan nanda' kalabus nape afagof 1,000-pelaiguf

1 Ea' ati anona ensel nakwaha heven nisila'i. Anen nahapila ki utaini ma nowaga anamba launai nagal nogowala awin ganii ma owa' nogotambilia. Ea' nahapila sen lu'unai wapani.*

* **19:19** Re 13:12-17; Re 20:10,15; Ais 30:33 * **19:20** Re 19:17-18

* **20:1** Re 12:9; Re 9:1

² Anen nahapila kwambon anamba lu'unai sisihina, kwambon anamba fowa'inai endilisi. Anen "Aman nagambaso'ma epes hiasii." Anen Satan. Ea' ensel anamba nowa'ana sen a' nope nondala' kalabus nondahama afagof 1,000-pelaiguf.*

³ Ensel anamba nakwahona nafe' nowala nowaga anamba launai ea' nowalomana uta ilif sisihita. Ea' Satan ina atiasi la'ifina ma nogambaso'ma esis mini'ap amam nematawa hiasi wapani, owa'. Anen ata' nope nosasa afagof 1,000-pelaiguf ama ata' hi'ilagofa main, dao' ensel anamba notagwahona wapani nefe'agon ganigani ma nogota bandata.*

⁴ Ama main owa', ati anom sia lu'wami kingi ma'oh ea' anis epes satoma sia amamba. God naso'asa banagami ma sogowaloga waf esis amam nematawai ma kot. Ea' ati ambagof epes isimba hiasi sagawalapa basef endilisifi Jisasi. Esis owa' sonda' lotuma mafin nagail alupi naloma ambal ananinai sagandombanaia, ea' owa' sogofa' anin ametal awani mafin anambai amagah lagof asasisia. Epes isimba sagahapila basef Jisasi tetele'ifi. Waf afamba atefa sanda' maol bu'wani, dei' esis bousi satopa' bambafugahas afis. Sosafel wapani sofa' ambal namili ea' sope dembesi king soloma Krais sope sondahama afagof 1,000-pelaiguf.

⁵ Nemaf afamba figali'i ma esis sagaga'i sili' sogosafel wandelef. Apa' epes isimba sagaga'i ina sofa' ambal namili nemaf afamba, ata' owa'. Esis ata' sope sosasa afagof agwafomba 1,000-pelaiguf

* **20:2** Ju 6 * **20:3** Dan 7:9,22,27; 1 Ko 6:2; Re 13:17

fefe'ma hi'ilagof.*

⁶ Epes isimba sotanima sogosafel nemaf afamba figali'i, esis sonohas sope hilili'. Ea' ga' inimba nigagi'i ina banagena negatalogofa epes isimba, owa'atin. Esis atiasi sope pris God noloma Kraisi sondolalimam. Ea' sope dembesi soloma Kraisa sugumafi anis epes afagof 1,000-pelaiguf.

Satan nofa' akafimi a' aona endilisi

⁷ Ama afagof agwafomba 1,000-pelaiguf hi'ilagof, dao'. Uta ea' tindawisi' kalabus ea' Satan nokwaha kalabus ananimi nuwisi ando'*. ^{*}

⁸ Anen nuwisi ando'ma atiasi nombaso'ma esis misi'ah amam nematawa hiasi sagape itap ana'e da'malifinama biafigin biafigin nafe' nogotambela, esis mini'ap Gok saloma Magoki. Atiasi Satan nokolaso esisa sonda' wandaf. Mini'ap asasipi amam nematawa isimba hiasi sandahama ko'onaga gaga'oh naoh akatai.*

⁹ Ea' sefe' ganimba itap hiagoma lauguni sondowasa' sonogama anamba amam nematawa Godi sogapoma noloma wambel taun inimba God okom maga'ian a'owa'i. Owa' nif fisila'i heven fendo soldia amamba Satani hi'ilam.*

¹⁰ I'i owa' main, God nokwahowa aman anamba Satan nagambaso'masi nefe' nowala nowaga unumuwanima si'i dumbi nif fandom wandafum otam salfa atapim magapani. Anom mali' makwahowa mafin nagail alupi naloma profet anamba nagambaso'ami mowala mape anamba. Amom biam moloma Satan mope anamba atapim

* **20:5** Re 1:6 * **20:7** Esi 38:2,9; Esi 38:15-16 * **20:8** 2 Kin 1:10;
Esi 39:6 * **20:9** Jen 19:24; Sam 11:6; Re 19:20, 21:8

mofa' akafimi owamb alip anamba nif wandafifi fandif atapif fagapoma.

God nawaloga epes sanda' waf awafi sagaga'i ma kot lu'utai

¹¹ Ea' ati sia lu'unai kingi afitinai na'oh, aman natoma sia inimba. Itap paloma otaga ilif saf'a'ma anen ea'sogapoma a'owa'anagona. Epes hiasi ina atiasi sotolom, owa'atin.*

¹² Ea' ati esis sagaga'i sape, epes isimba agufisi saloma isimba agof akasi salutu nogohnaep sia kingi. Ea' aman anamba nagatoma siai nupalia buk. Ea' nopalima ano'w buk wapani, ambal namili'wi. Ea' nawaloga esis hiasi sagaga'i hi'alas, nati amef fagape buk akwambai faga'i waf mama-hefa esis sanda'afi, nawaloga esis sagaga'i sandahama waf hiafi esis sanda'afi.*

¹³ Wambel sagaga'i sagapoma naloma naoh embel makwahowa epes isimba sagaga'i sotanimai ma nogota atamba. Ea' anen nagatoma sia kingi nawaloga esis hiasi atona atin sandahama waf hiafi esis sanda'afi.*

¹⁴ Ea' nakwaha ga' naloma wambel sagaga'i sagapoma mafe' mowala nowaga anamba launai unuwana si'i dumbi nif wandafifi fagandif faga-paunai. Nowaga anamba si'i ga' nogafe'ma bifi nogatagama epes hiasii.*

¹⁵ Ama i'i anen nagatoma sia kingi owa' nигати agol anin epeni gope buk akwamba ambal

* **20:11** Dan 7:9-10; Mt 25:31-46; Ap 17:31; 2 Ko 5:10; Re 13:8

* **20:12** Ro 2:6; 1 Pi 1:17; Re 2:23, 22:12 * **20:13** 1 Ko 15:26,55

* **20:14** Re 13:8, 19:20

namili'wia, nigi epen nokwahin newala nowaga
anamba nif ifimba fagandif fagapaunai.

21

Itapi otaga dambaisi

¹ Dei' ati itap paloma otaga dambaisi sape. Otaga apigai galoma itap apipi safe' higilalas hi'alas. Ea' naoh wapani ina ata' gotah, a' owa'atin.*

² Ea' ati taun wambel bu'wambili hilili'i, anamba Jerusalem dambaigima. Ati anamba nape naloma God, nakwaha heven nisila'i. Wambel anamba nanda' sosaf bu'unai atona nandandombol si'i nemata'w kwa'ikogaso' amani kwanda' sosaf bu'winai atona ma kogaso' aman akwa'unai.*

³ Ea' ame' anagol malogol gatagai sia kingi ga'i mehip na'amba ga'i, "Peme'! Dei' ipat Godi totawa taloma epes. Ama anen atiasi nogape la'afena esisa sogape amam nematawa ananisi. Aho', God anen atona nape nalomas.*

⁴ Anen atiasi nopati'masa embifa naep asasipi. Ama ina atiasi soga' wapani a nelelemb nimanilimb ea' esis ina atiasi selef some' akafimi wapani, a' owa'atin. Hiahaom amamba fowa'imi mowala higilalam hi'alam.*

⁵ Ea' aman anamba nagape sia lu'wani kingi na'i, "Peme'! Dei' anda' hiahaom hiami mataga dambaim hi'alam!"

* **21:1** Ais 52:1, 61:10; Hi 11:16, 12:22; Re 3:12; 2 Pi 3:13 * **21:2** 2

Kro 6:18; Sek 2:10; 2 Ko 6:16; Re 7:17 * **21:3** Ais 35:10; Ais 65:19

* **21:4** 2 Ko 5:17; Re 4:2,10

Ea' na'ipi wapani na'i, "Ina' da'a basef ifimba. Dei' main, basef ifimba endilisifi atif a'owa' ma sogahapilif endilisi."*

⁶ Ea' na'ipi wapani na'i, "Hiahaom amamba hiami mataga hi'alam. Ae' atowe agape Dembi-wai liflafi dondoli ape agali'i a ape agagi' endilisii. Ae' kofagewe ma agahapila hiahaom hiami hi'agalami anda' maol hiani ae'ani hi'agalani. Epen mamahina ni'i iap pegaso'ani, atiasi i'i aho'ma anin nea' embela ifata embel ambal namilimbeli. Ea' ese'anambel dowaf si'i presen hiahaom fasimi.*

⁷ Epen ni'i nilutu banagena negali'amona wandafa waf awafii, anin atiasi nef'a' hiahaom amamba fasimi ea' ae' a' epe God ananiwai, anin nepe awani ae'ani.*

⁸ Apa' epes isimba ombel mahasa sandahagas sogotanimai, isimba owa' sogahapifa Godia, epes sanda' waf naninani aona endilisii a epes isimba saha anis sagaga'i a epes isimba sanda' so'a wauli a isimba sanda' aupi a epes isimba sanda' lotuma god anamba baso'amunai, epes isimba hiasi sofa' wambel asasimbili ma nowaga anamba launai nif wandafifi fagandifi otam salfa fagapoma. Nowaga anamba launai si'i ga' nigi' nigatagai."*

Jerusalem dambaigima

⁹ Ea' anona ensel nafi'mai ae'. Anen ensel amom amamba 7-pelaim magahapila dis hiahaom magahambombaga epesi magalasi sandandami. Hia-

* **21:5** Sam 36:9; Jer 2:13; Jo 7:37; Re 1:8,17; Re 22:17 * **21:6** 2

Sml 7:14 * **21:7** Mt 25:41; Hi 10:38-39; Re 19:20, 21:27; Re 22:15

* **21:8** Re 15:1

haom amamba awami ma mugagi'i endilisi. Anen na'ipi na'i, "Ina' fi'i, ma igihimba'mina nemata'w sipsip noganai waulu'mana."*

¹⁰ Ea' Ambal bu'unai Godi nafela okom ae'ami, ensel anamba nofa'e afa' alota anof halaf laufi gani ilif. Ea' nihimba'me taun wambel ambalemba bu'wambili hilili'i Jerusalem, anamba nape naloma God ea' nakwaha heven nafi'i ata' nisila'i atin.*

¹¹ Glori nogogala'i si'i nagwapin Godi amom mogala'ma taun inimba. Ileliwa mogogala'i ananimi anom daiam endilisi si'i otam fasimi sagat-alom otamba hiambaii. Aho' amom si'i otam jaspa a pelele' a'owa' si'i glas.*

¹² Taun inimba indaleemb lu'wami laumi a'owa' malota ilif. Indaleemb ambalemb utagw 12-pelaigw ea' ensel 12-pelaim malutu felefele' mandandama utagw agwamba hiagwi. Ea' agof agwafomba fandahama misi'ah ahamba 12-pelaih epes Israeli fail fandanda utagw agwamba.

¹³ Indaleemb wa'alemb titi gani wa'ol awin nagaftima utagw wanogw. Apa' wa'ol awin natopa' negenafama sanda' utagw wanogw ea' gani awin natopa' negemba'ma sanda' wanogw ea' wa'ol awin negewalama sanda' wanogw.

¹⁴ Indaleemb ambalemb taun inimba, otamba lu'umbai 12-pelaimba bape ma begesahopa indaleemb itapilimba. Ea' agof amom aposel 12-pelaim sipsip noganaii fail fandanda otamba ambamba.*

* **21:9** Esi 40:2; Re 21:2 * **21:10** Ais 60:1-2,19 * **21:11** Esi 48:30-35 * **21:14** Re 11:1

15 Ea' ensel anamba nalome naga'ii nahapila bumbulita gol si'i ikwafa nogosaho' taun inimba ma indaleemb baloma utagw.

16 Taun anamba lu'wagoma. Indaleemb ambalemba dindiwaitagw biafigin biafigin ea' hilili' a'owa' endilisi. Wambel ambalemba tef wala, tagasa tol owin nalota nataga ilif dondo'ambel hilili' na'amba atin. Ensel nosaho'agon nondola'waifa taun inimba ma bumbulita ananinai ea' wambel ambalemba tef wala ikwaf fataga fandahama nohotagw hiagwi laugwi namba nataga 2,400 kilomita. Ea' tagasa ikwaf fataga na'amba atin 2,400 kilomita. Wambel ambalemba tol owin nalota nataga ilif, ikwaf afamba fataga na'amba atin 2,400 kilomita.

17 Anen nosaho' indaleemb nondola'waif wapani itap nalota nataga ilif. Ea' ikwaf indalelembi fikila' fataga 144 nohotagw bandagwi mita. Mita inimba, anin si'i esis epes sondola'waifa hiahawesani si'i rula. Ea' ensel nondola'waifa indaleemb ambalemba ma ikwaf afamba atef.

18 Indaleemb bigili'ama tauni amambai God atona nanda'am otamba ambamba jaspa. Ea' taun inimba God nanda' gol atom nanda'ana. Taun inimba nogala' nahihil a'owa' si'i glas.*

19 Indaleemb aunilimba ma taun inimba, God nofalo'malemba otamba mamimami bu'wami sagataloma moni hianii. Otam ulilitimi fasimi magali'i mali' mogombalo' indaleemb aunilimbai agol jaspa. Otam magagi'i kolotu'uni agol sapaia. Ea' anom magagi'i ma wanembai afitimi agol aget. Ea' anom magafe'ma biambai biambai ultimi agol emeral.

* **21:18** Ais 54:11-12

20 Ea' anom magafe'ma wanemba biambai agol sandonikis, amamba amom manda' apohi akwahim afitim. Ea' magafe'ma wanemba wanemba amom akwahimi agol konilian. Ea' magafe'ma 7-pelaimbai batafumi agol krisolait. Ea' magafe'ma 8-pelaimbai amamba ultimi anom mandati na'ai agol beril. Ea' anom magafe'ma 9-pelaimbai batafumi mandati na'ai agol topas. Ea' anom magafe'ma ilifunamaimbai agol krisopres amamba manda' apoh batafum ulilitim. Ea' magafe'ma 11-pelaimbai anom kolotu'umi mandati na'ai agol haiasin. Ea' anom magafe'ma 12-pelaimbai amamba anom akwahimi daiam agol amatis.

21 Utagw agwamba 12-pelaigw si'i bahigis afitisi 12-pelais sagalotamas a'owa'i. Anota uta sanda'ata anin bahigin lu'wani atitin. Taun inimba ufia'w atoto'w. Ufia'w akwamba gol atom mogogala' pelele' endilisi si'i embel glasi sanda'akw.*

22 Ae' ina ati ipat Godi lu'unai notawa taun inimba, owa'. Dei' main, Dembinai God Banagami Hiamunai naloma Sipsip Noganai, amom biam mape si'i ipat bu'unai Godi sanda' lotuwana ma taun inimba.*

23 Ea' taun inimba awin owambini alipini maol nenda'ani owa' anina ma wambel ambalemba howagalagon, owa'atin. Dei' main, mogogala'i lu'wami Godi atom mumafiagon manda'agon howalagon. Ea' Sipsip Noganai anen atona si'i nagwapin anamba.*

* **21:21** Re 15:3 * **21:22** Ais 60:19-20; Re 22:5 * **21:23** Ais 60:3,5

24 Epes itapasi hiasi hi'ilas atiasi sofa' mogogala'i atomo taun inimba. Ea' amom dembami king mugumafi itapi atiasi mofa'ai sosaf otamba mais amamisi mifi'mai wambel ambalemba.*

25 Alip esis ina sowalo utagwa indalelemb ambalemba, owa'. Gwagal atapigw gwape. Dei' main, owamb ina atiasi botaga taun inimba wambel lu'wambili, owa'atin.*

26 Sosafbu'wafi feloma otamba moni maina esis misi'ah epes hiasi anaf sofa'am suwisa wambel ambalemba.*

27 Apa' hiahaom awami alugumi a'a epes ami sanda' waf naninani aunaii ea' epes ami sanda' basef baso'afii, esis isimba soloma hiahaom awami ina sefe' siwisa wambel ambalemba, owa'atin endilisi. Sipsip Noganai nanda' agof anis epesi ea' fail buk akwamba ambal namili'wi, epes isimba atis anaf sefe' sogawis wambel ambalembai.

22

Embel walemb baloma lawag ambal namilisi

1 Ea' ensel anamba a' nihimba'me anemb walemb lu'wambi. Walemb ambamba ambal namilimbi ea' begala pelele' a'owa' si'i glas. Bewafa batagai sia lu'unai king Godi naloma Sipsip Noganai matoma sia lu'wani kingi ea' kolo'atin bafe!*

2 Walemb ambamba bafe' la'afena ufia'w lu'wakwi ma taun wambel anamba lu'wagoma.

* **21:24** Ais 60:11 * **21:25** Sek 14:7; Re 22:5 * **21:26** Ais 52:1;

1 Ko 6:9-10; Re 13:8, 21:8 * **22:1** Joe 3:18; Sek 14:8; Jen 2:9; Esi 47:12; Re 22:14,19; Esi 47:1

Walemb fisanai fisana lawah biagah ambal namiligahi hotawa. Ahoh hail hogola sa'utip danda atapigahi handanda aomb atona atina afagof danda atona atin. Nohotagw 12-pelaigw gwandahama aomb 12-pelaimb. Soh apuligaha honda' esis epes misi'ah hiasi sogataga bu'wasi.

³ Wambel ambalemba hiahaom hiami God nandaiwa'mam endilisi ma na'i nigali'amonami, hiahaom amamba ina atiasi mope wapani, a'owa'.

God noloma Sipsip Noganai, amom dao' anaf motoma sia lu'wami kingi mope mumafi epes isimba. Esis sonda' maol Godi atiasi sope sonda' lotumana sosa'ma agol ananigili.*

⁴ Anaf siti nogohnaep ananisi ma nond'a' agol ananigili gigail amagah asasigahi.*

⁵ Anaf owamb ina botaga wapani, owa'. Ea' ina ata' anom mogogala'i moloma lam nagwahis a owaf awini, owa'. Amamba maol akam. Dei' main, Dembinai God nogala' nihihima esis, anaf sope si'i king dembami dondol lifilafi.*

Anaf Jisas nift'i kwafalis atis

⁶ Ea' ensel anamba na'ipi na'amba na'i, "Basef ifimba hiafi fagape buk akwa'e endilisifi atif ea' andeande'ma epes hiasi sogahapifif. Dembinai God nagaso' amom profet Ambal bu'unai anan-inai nasapa'i ensel ananimi ma migihimba'ma esis sanda' maola anini ma hiahawes sogataga kwafalisi.*

* **22:3** Sam 42:2; Mt 5:8; Re 3:12 * **22:4** Dan 7:18,27; Re 5:10, 20:6;
Re 21:23,25 * **22:5** Re 1:1 * **22:6** Re 1:3, 2:16

7 Jisas na'i, "Peme'! Anaf ae' ifi'mai ipa' kwafalis atis. Basef Godi fagape buk akwa'e, basef ifimba ma hiahaom hiami ma'l i anaf migi' mogatagai. Epen ami nila basef ifimba, anin sonohan."*

8 Ae' Jon ame' basef ifimba ati amom hiahaom amamba ame'am ea'. Ea' indiwa nembawa etawa felefele'ma ensel anamba nighimba'me hiahaom amambai ma enda' lotuma anen.

9 Apa' owa', anen na'ipi na'i, "Ina' owa'i nenda'as na'ambaia, ae' ina dembiwai, owa'. Ae'i ina' wändao'oma wanda' maol atini waloma sahopena ine'imi profet fowa'imi maloma epes isimba hiasi sagaila basefa buk akwa'e. Ina' nenda' lotu ma God atona."*

10 Ea' na'ipi na'i, "Basef ifimba Godi fagape buk akwambai, ina nembahé'ef nesapamef fepe, owa'i. Dei' main, nogota God na'i nonda' hiahaom amambai, atamba ea' felefele'ma togataga hi'igalata.*

11 Ea' i'i epen ami nenda' waf awafi, anin nenda'af atapif. Epen ami nenda' waf alugufi awafii, anin nenda'af atapif. Apa' epen ami nenda' waf usi'ifii, anin nenda'af atapif. A epen ami negape hilili'i, anin nendape hilili' na'amba atin atapin."*

12 Ea' Jisas na'i, "Peme'! Anaf ae' etaga kwafalis. Ea' ifa'ai hiahaom bu'wami a'a awami, ewaloga esis egagwamasam hi'igalas atona atin monda-hama waf esis sanda'afi.*

* **22:7** Re 19:10 * **22:9** Re 1:3, 10:4 * **22:10** Dan 12:10 * **22:11**
Ais 40:10; 2 Ko 11:15; Re 2:16,23 * **22:12** Re 1:8,17, 21:6

13 Ae' atowe agape Dembiwai lifilafi dondoli, ape agali'i a ape agagi' endilisii. Ae' kofagewe ma hiahaom hiamii ea' enda'am efe' efe' imbifam datima hi'ilam.*

14 "Esis amam nematawa sagasa'opa luwaguf mais asasisi ma sagataga bu'wasi, esis sonohas. Esis isimba anaf ila ma sogofa' gwa'aisi ma lawag agamba ambal namiligai ea' la'ifisa sofe' sogawis uta atamba ma wambel ambalemba bu'wambili.*

15 Epes sanda' waf awafii si'i bogof nombagwi soloma epes isimba sanda' audi, epes isimba sanda' waf so'a waulafi soloma epes saha anis sagaga'i a epes isimba sanda' lotuma ambal baso'amunai ea' epes isimba hiasi ukup pagaila waf baso'afi ma sagailafi, epes isimba anaf sope ando'ma wambel ambalemba Godi."*

16 Ea' Jisas na'ias wapani na'i, "Ae' asapa' ensel ae'anai nafe'mago ipa' ma nogawalapa basef ifimba ma ipa' sios amam nematawa Kristen. Ae' atowe ae' dapana nandala nombaf lawag Deviti, bafamana ananiwai agataga wambota ananitai. Ea' ae' si'i ondo'w akwamba kogogala' a'owa'i kwagatafi kuhumbitai.*

17 Ambal bu'unai Godi naloma nemata'w Sip-sip Noganai nogaso'akwi esis sa'i, 'Ipa' fi'i!' Ea' epen ami negame' basef ifimbai, anin ni'i basef ifimba atif ninda'i 'Ipa' fi'i.' Ea' epen ami iap pegaso'ana embeli, anin nindaf'i. Epen ami na'i nega' embeli, anin nifi'i nendefa' embel ambal

* **22:13** Re 22:2 * **22:14** Re 21:17 * **22:15** Nam 24:17; Ro 1:3;
Re 2:28, 5:5 * **22:16** Sol 8:14; Re 21:6

namili lagapaimbeli si'i presen hiahaom bu'wami
God nogaso'asam dowafi, owa' sogatalomia.*

¹⁸ Ipa' epes mamahipama pagame' basef Godi
ma hiahawes isimba sagail buk akwa'e anaf sogotagai,
ae' a'ipa ipa' hipai dindinip, ipa' solawaipa.
I'i anin epen niwatani anif basef wapani feloma
basef Godi, anaf hiahaom amamba awasim endilisii
God naga'iami ma buk akwa'ii, amamba anaf
God nokolefamanam anin.*

¹⁹ Ama i'i anin epen nehape' anif basef
du'wanif Godi faga'i hiahawes anaf sogotagai
ma nili'amenefa buk akwa'e, anaf God nili'amona
epen inimba ea' nelefatan. Ea' anin ina anaf
la'ifina negefa' gwa'aisi ma lawag agamba ambal
namiligai, owa!. Anaf ina la'ifina nefe' negape
andeande' wambel ambalemba bo'wambel
hilili'i, buk akwa'e kwaga'igoma, owa'atin."*

²⁰ Aman anamba Dembinai naga'i basefa hia-
hawes isimba hiasi sagail buk akwa'e dei' na'i,
"Endilisi atis, atiasi ifi'i kwafalis atis!"

Aho', Dembinai Jisas, ina' nifi'i!

²¹ Ae' a'i Dembinai Jisas nondatopalopa ipa'
hipai dowaf nowa' banagaipa. Endilisi.

* **22:17** Diu 4:2, 12:32; Re 15:1,6 * **22:18** Re 22:2 * **22:19** Re 2:16

**Basef Bu'wafi Godi
The New Testament in the Mufian Language
Nupela Testamen long tokples Mufian long Niugini**
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 25 Aug 2024 from source files
dated 31 Aug 2023

b0cff915-4005-598f-9bbc-38b1e35d47b1